



ცესკო

საპარტევლოს საარჩევნო
ადმინისტრაცია


საპარტევნო სისტემების განვითარების,
რეფორმებისა და სწავლების

ცენტრი



დამხმარე სახელმძღვანელო პოლიტიკური პარტიის წარმომადგენლებისთვის

საპარტევლოს კარლამენდის
შუალედური არჩევნები
2013



სარჩევი

თავი 1. ზოგადი ნაწილი.....	3
1.1. საარჩევნო სუბიექტის წარმომადგენელი	3
1.2. საარჩევნო სუბიექტის წარმომადგენელთა რეგისტრაცია	3
1.3. საარჩევნო სუბიექტის წარმომადგენლის დაფინანსება	4
1.4. საარჩევნო სუბიექტის წარმომადგენლის უფლებრივი მდგომარეობა.....	4
 თავი 2. კენჭისყრის დღემდე პერიოდი	6
2.1. საოლქო საარჩევნო კომისიების დაკომპლექტება და უფლებამოსილებები	6
2.2. საუბნო საარჩევნო კომისიების დაკომპლექტება და უფლებამოსილებები.....	7
2.3. ამომრჩეველთა ერთიანი სია	10
2.5. ამომრჩეველთა სპეციალური სია.....	11
2.5. გადასატანი საარჩევნო ყუთის სია.....	12
2.6. არჩევნებში მონაწილე სუბიექტების რეგისტრაცია.....	13
2.7. დამკვირვებელი ორგანიზაციების რეგისტრაცია.....	14
2.8. პრესისა და მასობრივი ინფორმაციის სხვა საშუალებების წარმომადგენელთა აკრედიტაცია .	17
2.9. წინასაარჩევნო კამპანია	17
2.10. კენჭისყრის შენობის მოწყობა	21
 თავი 3. კენჭისყრის დღე.....	22
3.1. საარჩევნო უბნის გახსნა.....	22
3.2. კენჭისყრის პროცესი	27
3.3. საარჩევნო უბნის დახურვა, კენჭისყრის შედეგების შეჯამება	32
 თავი 4. კენჭისყრის დღის შემდგომი პერიოდი	40
4.1. საოლქო საარჩევნო კომისიის მიერ კენჭისყრისა და არჩევნების შედეგების შეჯამება.....	40
4.2. ცესკოს მიერ არჩევნების შედეგების შეჯამება	41
 თავი 5. საარჩევნო კომისიებში განცხადება/საჩივრის შეტანისა და განხილვის წესი	41
5.1. საუბნო საარჩევნო კომისიაში განცხადება/საჩივრის შეტანისა და განხილვის წესი	41

5.2. საოლქო საარჩევნო კომისიაში განცხადება/საჩივრის შეტანისა და განხილვის წესი	45
5.3. ცესკოში განცხადება/საჩივრის შეტანისა და განხილვის წესი	50
5.4. ადმინისტრაციულ სამართალდარღვევათა ოქმის შედგენა	53
5.5. საჩივრების რეესტრი	54
დანართი №1 - განცხადება/საჩივარი	55
დანართი №2 - საარჩევნო კომისიაში წარდგენილი განცხადება/საჩივრის რეკვიზიტები	56

1.1. საარჩევნო სუბიექტის წარმომადგენელი

საარჩევნო სუბიექტის (არჩევნებში დამოუკიდებლად მონაწილე პარტიის, საარჩევნო ბლოკის, ამომრჩეველთა საინიციატივო ჯგუფის) წარმომადგენელი საარჩევნო სუბიექტს წარმოადგენს შესაბამის საარჩევნო კომისიასთან ურთიერთობაში.

არჩევნებში დამოუკიდებლად მონაწილე პარტიას/საარჩევნო ბლოკს უფლება აქვს, ერთი ან რამდენიმე სახის არჩევნებისას ყოველ საარჩევნო კომისიაში დანიშნოს მხოლოდ 2 წარმომადგენელი. ამომრჩეველთა საინიციატივო ჯგუფს უფლება აქვს წარმომადგენლები დანიშნოს შესაბამის საარჩევნო ოლქში არსებულ საარჩევნო კომისიებში.

1.2. საარჩევნო სუბიექტის წარმომადგენელთა რეგისტრაცია (საარჩევნო კოდექსი - მუხლი 42)

არჩევნებში დამოუკიდებლად მონაწილე პარტიამ, საარჩევნო ბლოკმა, ამომრჩეველთა საინიციატივო ჯგუფმა წარმომადგენლის დანიშვნის შესახებ უნდა აცნობოს შესაბამის საარჩევნო კომისიას.

საარჩევნო სუბიექტის წარმომადგენლის დანიშვნის შესახებ განცხადებას ხელს უნდა აწერდეს:

- ▶ პარტიის/საარჩევნო ბლოკის ხელმძღვანელი პირი ან მის მიერ უფლებამოსილი პირი;
- ▶ ამომრჩეველთა საინიციატივო ჯგუფის წარმომადგენელი ზემდგომ საარჩევნო კომისიაში.

განცხადებაში აღნიშნული უნდა იყოს წარმომადგენლის გვარი, სახელი, დაბადების წელი, მისამართი, საკონტაქტო ტელეფონის ნომერი (თუ აქვს).

ინფორმაციის სრულყოფილად წარდგენის შემთხვევაში საარჩევნო კომისიის თავმჯდომარე **24 საათის განმავლობაში** განკარგულებით ცნობად იღებს ინფორმაციას წარმომადგენლის რეგისტრაციის შესახებ. საარჩევნო სუბიექტის წარმომადგენელს რეგისტრაციაში ატარებს და **სათანადო მოწმობებს გასცემს:**

- ▶ ცესკოს თავმჯდომარე - თუ წარმომადგენელი წარდგენილია ცესკოში (საარჩევნო კოდექსი - მუხლი 15.2.დ.ვ);
- ▶ ცესკოს მდივანი - თუ წარმომადგენელი წარდგენილია საოლქო საარჩევნო კომისიაში (საარჩევნო კოდექსი - მუხლი 15.4.ბ);
- ▶ საოლქო საარჩევნო კომისიის მდივანი - თუ წარმომადგენელი წარდგენილია საუბნო საარჩევნო კომისიაში (საარჩევნო კოდექსი - მუხლი 22.3.ბ).

ყურადღება!

- ▶ წარმომადგენლის მოწმობა იმავდროულად არის სამკერდე ნიშანი.
- ▶ საარჩევნო სუბიექტს უფლება აქვს, არჩევნების დღემდე ნებისმიერ დროს გამოიწვიოს ან/და შეცვალოს თავისი წარმომადგენელი, რის თაობაზედაც უნდა აცნობოს შესაბამის საარჩევნო კომისიას.

1.3. საარჩევნო სუბიექტის წარმომადგენლის დაფინანსება (საარჩევნო კოდექსი - მუხლი 43)

„მოქალაქეთა პოლიტიკური გაერთიანებების შესახებ“ საქართველოს ორგანული კანონის შესაბამისად დაფინანსების მქონე პოლიტიკური პარტია, აგრეთვე საარჩევნო ბლოკი, რომელშიც ასეთი პარტიაა გაერთიანებული, არჩევნების დღეს საოლქო და საუბნო საარჩევნო კომისიებში წარმომადგენლობის უზრუნველყოფის მიზნით დაფინანსებას მიიღებს ყოველ საარჩევნო უბანზე 60 ლარის ოდენობით, ხოლო ყოველ საარჩევნო ოლქზე – 120 ლარის ოდენობით.

კვალიფიციური საარჩევნო სუბიექტის წარმომადგენლის დაფინანსების თანხა ცესკომ შესაბამისი საარჩევნო სუბიექტის ანგარიშზე უნდა ჩარიცხოს არჩევნებამდე არა უგვიანეს 3 დღისა (24 აპრილი).

პოლიტიკური პარტია, აგრეთვე საარჩევნო ბლოკი, უფლებამოსილია ეს თანხა გადაანაწილოს საოლქო და საუბნო საარჩევნო კომისიებში შესაბამის წარმომადგენლობაზე ისე, რომ თითოეულ კომისიაში დაფინანსდეს არა უმეტეს 2 წარმომადგენლის საქმიანობა, ამასთანავე, სხვადასხვა წარმომადგენლის დაფინანსება უნდა მოხდეს საარჩევნო ოლქებისა და საარჩევნო უბნების ნახევარში მაინც.

თუ დაფინანსების მქონე პოლიტიკურ პარტიას არ ეყოლება წარმომადგენელი საარჩევნო ოლქში ან/და საარჩევნო უბანში ან/და არ მოხდა თანხის სრულად ათვისება, პარტია ვალდებულია არჩევნების შედეგების შეჯამებიდან 15 დღის ვადაში უზრუნველყოს შესაბამისი თანხის საქართველოს სახელმწიფო ბიუჯეტში დაბრუნება.


1.4. საარჩევნო სუბიექტის წარმომადგენლის უფლებრივი მდგომარეობა

საარჩევნო სუბიექტის წარმომადგენელს უფლება აქვს თავისუფლად, დაუბრკოლებლად დააკვირდეს საარჩევნო პროცესის მიმდინარეობას →

საარჩევნო სუბიექტის წარმომადგენელს **უფლება აქვს:**

(საარჩევნო კოდექსი - მუხლი 42.5)

- ▶ დაესწროს და დააკვირდეს საარჩევნო კომისიის სხდომებს, მოითხოვოს სიტყვით გამოსვლა და აზრის გამოთქმა, ამა თუ იმ საკითხზე გადაწყვეტილების მიღება;
- ▶ ნებისმიერ დროს იმყოფებოდეს კენჭისყრის შენობაში, შეუზღუდავად გადაადგილდეს საარჩევნო უბნის ტერიტორიაზე და თავისუფლად, დაუბრკოლებლად დააკვირდეს კენჭისყრის პროცესის ყველა ეტაპს ნებისმიერი ადგილიდან;
- ▶ ნებისმიერ დროს შეენაცვლოს მისი წარმდგენი სუბიექტის სხვა რეგისტრირებულ წარმომადგენელს (ასეთის არსებობის შემთხვევაში);
- ▶ მონაწილეობა მიიღოს საარჩევნო ყუთების შემოწმებაში მათ დალუქვამდე და მათი გახსნის შემდეგ;
- ▶ დააკვირდეს ამომრჩეველთა სიებში ამომრჩეველთა რეგისტრაციას, საარჩევნო ბიულეტენებისა და სპეციალური კონვერტების გაცემას და მათ დამოწმებას კენჭისყრის პროცესისათვის ხელის შეუშლელად;
- ▶ დაესწროს ამომრჩეველთა ხმების დათვლისა და შედეგების შეჯამების პროცედურებს;



- ▶ დააკვირდეს გადასატანი საარჩევნო ყუთის მეშვეობით ხმის მიცემის პროცესს;
- ▶ დააკვირდეს ამომრჩეველთა ხმების დათვლას ისეთ პირობებში, რომლებიც უზრუნველყოფს საარჩევნო ბიულეტენის დანახვას;
- ▶ დააკვირდეს საარჩევნო კომისიის მიერ კენჭისყრის შედეგების შემაჯამებელი ოქმისა და სხვა დოკუმენტების შედგენას;
- ▶ განცხადებით (საჩივრით) მიმართოს საუბნო საარჩევნო კომისიის თავმჯდომარეს ხმის მიცემისა და კენჭისყრის პროცედურებთან დაკავშირებულ საკითხებზე, რომლითაც კონკრეტული დარღვევის დაფიქსირების შემთხვევაში მოითხოვს რეაგირებას;
- ▶ მოსთხოვოს ამომრჩეველს, უჩვენოს, რამდენი საარჩევნო ბიულეტენი და სპეციალური კონვერტი აქვს ხელში;
- ▶ გაასაჩივროს საარჩევნო კომისიის ქმედება;
- ▶ დააკვირდეს საარჩევნო ყუთს, საარჩევნო ყუთში სპეციალური კონვერტების ჩაყრას, საარჩევნო ყუთების გახსნას, საარჩევნო ბიულეტენების დათვლას და ოქმის შედგენას;
- ▶ მთვლელებთან ერთად მონაწილეობა მიიღოს ნამდვილი ან/და ბათილი საარჩევნო ბიულეტენების დათვლის პროცესში (წილისყრით გამოავლენის შემთხვევაში);
- ▶ გაეცნოს საარჩევნო კომისიების მიერ შედგენილ კენჭისყრისა და არჩევნების შედეგების შემაჯამებელ ოქმებს, მოითხოვოს და მიიღოს ამ ოქმების ასლები;
- ▶ გახორციელოს საქართველოს საარჩევნო კანონმდებლობით მინიჭებული სხვა უფლებამოსილებები.

ყურადღება!

საარჩევნო სუბიექტის წარმომადგენლის საარჩევნო კოდექსით დადგენილი უფლებების შეზღუდვა ან მისი საქმიანობისათვის ხელის შეშლა გამოიწვევს შესაბამისი პირის დაჯარიმებას 500 ლარის ოდენობით (საარჩევნო კოდექსი - მუხლი 91).

საარჩევნო სუბიექტის წარმომადგენელს უფლება არ აქვს (საარჩევნო კოდექსი - მუხლი 41):

- ▶ გავლენა მოახდინოს ამომრჩეველთა მიერ ნების თავისუფალ გამოვლენაზე;
- ▶ აგიტაცია გაუწიოს ამომრჩეველს რომელიმე საარჩევნო სუბიექტის სასარგებლოდ ან საწინააღმდეგოდ;
- ▶ ატაროს რომელიმე საარჩევნო სუბიექტის სიმბოლიკა და ნიშანი;

ყურადღება!

ზემოაღნიშნული მოთხოვნების დარღვევა გამოიწვევს შესაბამისი პირის დაჯარიმებას 500 ლარის ოდენობით (საარჩევნო კოდექსი - მუხლი 92).

- ▶ ჩაერიოს საარჩევნო კომისიის ფუნქციებსა და საქმიანობაში;
- ▶ კენჭისყრის დღეს კენჭისყრის შენობაში იმყოფებოდეს სამკერდე ნიშნის გარეშე.

ყურადღება!

საარჩევნო კომისიას უფლება აქვს, კომისიის მუშაობისთვის ხელის შეშლისა და წესრიგის დარღვევის შემთხვევაში, საარჩევნო სუბიექტის წარმომადგენელი გააძევოს კომისიის განთავსების შენობიდან (საარჩევნო კოდექსი - მუხლი 8.18).



ძირითადი აქტივობები


2.1.	საოლქო საარჩევნო კომისიების დაკომპლექტება
2.2.	საუბნო საარჩევნო კომისიების დაკომპლექტება
2.3.	ამომრჩეველთა ერთიანი სიის გამოქვეყნება
2.4.	ამომრჩეველთა სპეციალური სიის ფორმირება
2.5.	გადასატანი ყუთის სიის ფორმირება
2.6.	არჩევნებში მონაწილე სუბიექტების (პარტია/საარჩევნო ბლოკი, საინიციატივო ჯგუფი, კანდიდატები) რეგისტრაცია
2.7.	დამკვირვებელი ორგანიზაციების რეგისტრაცია
2.8.	პრესისა და მასობრივი ინფორმაციის სხვა საშუალებების წარმომადგენელთა აკრედიტაცია
2.9.	წინასაარჩევნო კამპანია
2.10.	კენჭისყრის შენობის მოწყობა

2.1. საოლქო საარჩევნო კომისიების დაკომპლექტება და უფლებამოსილებები

საოლქო საარჩევნო კომისიის შემადგენლობა

საოლქო საარჩევნო კომისია შედგება 13 წევრისაგან (საარჩევნო კოდექსი - მუხლი 19.3-5):

- ▶ 5 წევრს ირჩევს ცესკო (5 წლით);
- ▶ 7 წევრს ნიშნავენ პარტიები (ინიშნებიან არჩევნების დანიშვნის შემდეგ და უფლებამოსილება უწყდებათ საბოლოო შედეგების გამოცხადებისთანავე);
- ▶ 1 წევრს ირჩევს ცესკო (არჩევნების დანიშვნის შემდეგ, მას უფლებამოსილება უწყდება საბოლოო შედეგების გამოცხადებისთანავე).



2.2. საუბნო საარჩევნო კომისიების დაკომპლექტება და უფლებამოსილებები

საუბნო საარჩევნო კომისიის შემადგენლობა

საუბნო საარჩევნო კომისია შედგება 13 წევრისაგან (საარჩევნო კოდექსი - მუხლი 24.1,2,4):

- ▶ 6 წევრს კონკურსის საფუძველზე ირჩევს საოლქო საარჩევნო კომისია;
- ▶ 7 წევრს ნიშნავენ პარტიები.

ყურადღება!

საარჩევნო კომისიის წევრი არ არის მისი დამნიშვნელი/ამრჩევი სუბიექტის წარმომადგენელი. იგი თავის საქმიანობაში დამოუკიდებელია და ემორჩილება მხოლოდ საქართველოს კანონმდებლობას.

საუბნო საარჩევნო კომისიის წევრის უფლებამოსილება იწყება საუბნო საარჩევნო კომისიის პირველი შეკრების დღეს და წყდება შესაბამის საოლქო საარჩევნო კომისიაში კენჭისყრის შედეგების შემაჯამებელი ოქმის შედგენისთანავე (საარჩევნო კოდექსი - მუხლი 25.14).

ყურადღება!

აკრძალულია საუბნო საარჩევნო კომისიის წევრის გამოწვევა კენჭისყრის დღემდე 15 დღით ადრე (12 აპრილი).

საუბნო საარჩევნო კომისიის ხელმძღვანელი პირების უფლებამოსილებები

(საარჩევნო კოდექსი - მუხლი 27)

თავმჯდომარე

- ▶ იწვევს და უძღვება კომისიის სხდომას;
- ▶ იღებს და ანაწილებს კომისიაში შემოსულ საბუთებს და კორესპონდენციას;
- ▶ პირადად აგებს პასუხს საარჩევნო დოკუმენტაციისა და ინვენტარის შენახვა/ გაცემაზე;
- ▶ დავალებას აძლევს თავმჯდომარის მოადგილეს, კომისიის მდივანსა და კომისიის სხვა წევრებს;
- ▶ კენჭისყრის დღეს ორგანიზებას უწევს კომისიის წევრთა შორის ფუნქციათა წილისყრით განაწილებას;
- ▶ პასუხისმგებელია წესრიგის დაცვაზე საარჩევნო უბნის შენობაში და მიმდებარე ტერიტორიაზე;
- ▶ ვალდებულია კენჭისყრის შენობაში არ დაუშვას პირები შესაბამისი სამკერდე ნიშნის გარეშე;
- ▶ კენჭისყრის შედეგების შეჯამებისთანავე ზემდგომ საოლქო საარჩევნო კომისიას გადასცემს ყველა საარჩევნო დოკუმენტაციას.

მოადგილე

- ▶ ასრულებს კომისიის თავმჯდომარის მოვალეობას, თუ კომისიას არ ჰყავს თავმჯდომარე ან მას არ შეუძლია თავისი მოვალეობის შესრულება;
- ▶ კომისიის თავმჯდომარის განკარგულებით ახორციელებს კომისიის თავმჯდომარის ცალკეულ უფლებამოსილებას.

მდივანი

- ▶ ამზადებს კომისიის სხდომის დღის წესრიგსა და განკარგულებათა პროექტებს;
- ▶ პასუხისმგებელია საჯარო ინფორმაციის გაცემაზე;
- ▶ ადგენს კომისიის სხდომათა ოქმებს, მათ შორის, კენჭისყრის შედეგების შემაჯამებელ ოქმს.

საუბნო საარჩევნო კომისიის პირველი სხდომა

(საარჩევნო კოდექსი - მუხლი 8.3,23; 25.21)

საუბნო საარჩევნო კომისიის პირველი სხდომა იმართება არჩევნების დღემდე არაუგვიანეს 34-ე დღისა (24 მარტი). სხდომა მოიწვევა საოლქო საარჩევნო კომისიის თავმჯდომარის მიერ.

სხდომა უფლებამოსილია, თუ მას ესწრება კომისიის სრული შემადგენლობის უმრავლესობა, არანაკლებ 7 წევრი.

სხდომას თავმჯდომარის არჩევამდე ხელმძღვანელობს კომისიის უხუცესი წევრი.

თავმჯდომარე/მოადგილის არჩევის წესი

(საარჩევნო კოდექსი - მუხლი 25)

▶ საუბნო საარჩევნო კომისიის თავმჯდომარე/მოადგილე ირჩევა კომისიის წევრთაგან სახელობითი კენჭისყრით, კომისიის სრული შემადგენლობის უმრავლესობით;

- ▶ კანდიდატურის წარდგენის უფლება აქვს კომისიის არანაკლებ 2 წევრს;
- ▶ ერთი და იმავე კანდიდატურის დასახელება შეიძლება მხოლოდ ორჯერ;
- ▶ დასახელებულ კანდიდატს უფლება აქვს მონაწილეობა მიიღოს კენჭისყრაში და ხმა მისცეს საკუთარი კანდიდატურის სასარგებლოდ.

ყურადღება!

თუ ვერ აირჩა კომისიის თავმჯდომარე/მოადგილე, აღნიშნული ხელმძღვანელი პირის მოვალეობას მის არჩევამდე ასრულებს კომისიის ის წევრი, რომელიც კენჭისყრისას ყველაზე მეტ ხმას მიიღებს, ხოლო ხმათა თანაბრობის შემთხვევაში – მათგან წილისყრით განსაზღვრული პირი.

მდივნის არჩევის წესი

(საარჩევნო კოდექსი - მუხლი 25)

▶ საუბნო საარჩევნო კომისიის მდივანი აირჩევა პარტიების მიერ დანიშნულ წევრთაგან (გარდა ერთიანი ნაციონალური მოძრაობის მიერ დანიშნული წევრისა);

- ▶ კომისიის მდივნის კანდიდატურის წარდგენის უფლება აქვს პარტიების მიერ დანიშნულ საუბნო საარჩევნო კომისიის არანაკლებ 2 წევრს (გარდა ერთიანი ნაციონალური მოძრაობის მიერ დანიშნული წევრისა);
- ▶ კომისიის მდივანი აირჩევა სახელობითი კენჭისყრით, სხდომაზე დამსწრეთა უმრავლესობით, პარტიების მიერ დანიშნული საუბნო საარჩევნო კომისიის წევრების მიერ (გარდა ერთიანი ნაციონალური მოძრაობის მიერ დანიშნული წევრისა);
- ▶ თუ პარტიების მიერ დანიშნული კომისიის წევრები ვერ აირჩევენ კომისიის მდივანს, მას წარდგენილი კანდიდატურებიდან **ირჩევს კომისია** სრული შემადგენლობის უმრავლესობით (არანაკლებ 7 წევრი);
- ▶ თუ ამ შემთხვევაშიც ვერ აირჩა კომისიის მდივანი, მის მოვალეობას კომისიის მდივნის არჩევამდე ასრულებს კომისიის ის წევრი, ვინც კენჭისყრის დროს ყველაზე მეტი ხმა მიიღო, ხოლო ხმათა თანაბრობის შემთხვევაში – მათგან წილისყრით განსაზღვრული პირი;

- ▶ თუ პარტიების მიერ დანიშნული კომისიის წევრების მიერ არ იქნა დასახელებული კომისიის მდივნის კანდიდატურა, ამ შემთხვევაში კომისიის მდივნის კანდიდატურის დასახელების უფლება აქვს კომისიის ნებისმიერ 2 წევრს. კომისიის მდივანი აირჩევა კომისიის შემადგენლობიდან, კომისიის სრული შემადგენლობის უმრავლესობით (არანაკლებ 7 წევრი).

ყურადღება!

- ▶ დასახელებულ კანდიდატს უფლება აქვს მონაწილეობა მიიღოს კენჭისყრაში და ხმა მისცეს საკუთარი კანდიდატურის სასარგებლოდ.
- ▶ საუბნო საარჩევნო კომისიის ხელმძღვანელ პირთა არჩევა ფორმდება საუბნო საარჩევნო კომისიის განკარგულებით.

2.3. ამომრჩეველთა ერთიანი სია

ამომრჩეველთა ერთიანი სიის გამოქვეყნების

(საარჩევნო კოდექსი - მუხლი 31)

საუბნო საარჩევნო კომისიას არა უგვიანეს პირველი შეკრების დღისა (კენჭისყრის დღემდე არა უგვიანეს 34-ე დღე, 24 მარტი) გადაეცემა საოლქო საარჩევნო კომისიის თავმჯდომარისა და კომისიის მდივნის მიერ ხელმოწერილი ამომრჩეველთა ერთიანი სია, რომელიც განკუთვნილია საჯარო ინფორმაციისთვის (კედლის სია).

საუბნო საარჩევნო კომისიას კენჭისყრის დღემდე არა უგვიანეს მეორე დღისა (25 აპრილი) გადაეცემა დაზუსტებული სიების საბოლოო ვერსიები:

- ▶ საარჩევნო კომისიისათვის განკუთვნილი ვერსია (სამაგიდო სია);
- ▶ საჯარო ინფორმაციისთვის განკუთვნილი ვერსია (კედლის სია).

კედლის სია დაუყოვნებლივ უნდა გამოიკრას საუბნო საარჩევნო კომისიის შენობაში თვალსაჩინო ადგილას.

ყურადღება!

დაუშვებელია საარჩევნო კომისიისათვის განკუთვნილი ვერსიის (სამაგიდო სიის) და მისი ასლის საჯარო ინფორმაციის სახით გაცემა.

ამომრჩეველთა ერთიანი სიის მონაცემთა გადამოწმება

(საარჩევნო კოდექსი - მუხლი 31.7-10)

საარჩევნო რეგისტრაციის მქონე პარტიას/საარჩევნო ბლოკს, დამკვირვებელ ორგანიზაციას, ამომრჩეველს უფლება აქვს გაეცნოს საოლქო და საუბნო საარჩევნო კომისიებში არსებულ ამომრჩეველთა სიების საჯარო ინფორმაციისათვის მიკუთვნილ ვერსიას. უზუსტობების აღმოჩენის შემთხვევაში მათ შეუძლიათ მოითხოვონ ამომრჩეველთა სიებში ცვლილებების შეტანა არჩევნებამდე არა უგვიანეს **მე-16 დღისა** (11 აპრილი). ამომრჩეველთა სიებში ცვლილებების შეტანის თაობაზე განცხადებები შეიტანება **საარჩევნო ადმინისტრაციაში**.

ყურადღება!

ამომრჩეველს უფლება აქვს, მოითხოვოს მხოლოდ მისი და მისი ოჯახის წევრთა შესახებ არსებული ყველა მონაცემის გაცნობა და მათში ცვლილების შეტანა.

განცხადებების განიხილვასა და გადაწყვეტილების მიღებაზე უფლებამოსილი ორგანოა საოლქო საარჩევნო კომისია. კომისია განცხადებებს განიხილავს 2 კალენდარული დღის ვადაში (მაგრამ არჩევნების დღემდე არა უგვიანეს მე-14 დღისა - 13 აპრილი) და იღებს გადაწყვეტილებას:

- ▶ ამომრჩეველთა მონაცემებში/ სიებში ცვლილების შეტანის შესახებ, ან
- ▶ ამომრჩეველთა მონაცემებში/ სიებში ცვლილების შეტანაზე უარის თქმის შესახებ.

ყურადღება!

განკარგულება ამომრჩეველთა მონაცემებში/ სიებში ცვლილების შეტანაზე უარის თქმის შესახებ დასაბუთებული უნდა იყოს და მისი გამოცემის მომდევნო დღიდან, მოთხოვნისთანავე, უნდა გადაეცეს განმცხადებელს.

შესაბამის საუბნო საარჩევნო კომისიას. მოთხოვნის დაკმაყოფილების შემთხვევაში:

- ▶ ამომრჩეველი შეიყვანება სიაში, ან
- ▶ ამომრჩევლის მონაცემი ამოიღება ამომრჩეველთა სიებიდან.

საოლქო საარჩევნო კომისიის განკარგულება სიაში ცვლილების შეტანის მოთხოვნაზე უარის თქმის შესახებ, მისი გამოცემიდან 2 დღის ვადაში შეიძლება გასაჩივრდეს რაიონულ/საქალაქო სასამართლოში.

სასამართლოს მიერ სარჩელის დაკმაყოფილების შემთხვევაში სასამართლოს გადაწყვეტილება 2 დღის ვადაში, მაგრამ არჩევნების დღემდე არა უგვიანეს მე-11 დღისა (16 აპრილი), უნდა გადაეცეს საოლქო საარჩევნო კომისიას. კომისიამ სათანადო ინფორმაცია დაუყოვნებლივ უნდა მიაწოდოს ცესკოსა და შესაბამის საუბნო საარჩევნო კომისიას.

2.5. ამომრჩეველთა სპეციალური სია (საარჩევნო კოდექსი - მუხლი 32)

ამომრჩეველთა სპეციალურ სიას ადგენს და განკარგულებით ამტკიცებს საოლქო საარჩევნო კომისია კენჭისყრის დღემდე არაუგვიანეს მე-3 დღისა (24 აპრილი) და დაუყოვნებლივ გადასცემს შესაბამის საუბნო საარჩევნო კომისიას.

ამომრჩეველთა სპეციალურ სიაში საოლქო საარჩევნო კომისიას შეყავს:

- ▶ საარჩევნო ადმინისტრაციის მოხელეები, რომლებიც საარჩევნო კომისიებში საქმიანობის გამო, კენჭისყრის დღეს ვერ მონაწილეობენ არჩევნებში თავიანთი რეგისტრაციის ადგილის მიხედვით;
- ▶ ამომრჩევლები, რომლებიც სამკურნალოდ წვანან საავადმყოფოში ან სხვა სტაციონარულ სამკურნალო დაწესებულებაში და მათი ჯანმრთელობის მდგომარეობიდან გამომდინარე, კენჭისყრის დღისთვის ვერ იქნებიან გაწერილი ამ დაწესებულებიდან;
- ▶ ამომრჩევლები, რომლებიც კენჭისყრის დღეს პატიმრობაში იმყოფებიან.

თუ ამომრჩეველთა სიებში რეგისტრაციის მოთხოვნით საოლქო საარჩევნო კომისიას მიმართავს ამომრჩეველი, რომელმაც არჩევნების დღემდე არა უგვიანეს მე-16 დღისა (11 აპრილი) ვერ მოასწრო მიემართა კომისიისთვის სიაში რეგისტრაციის მოთხოვნით (ჩამოვიდა საზღვარგარეთიდან, გამოეწერა საავადმყოფოდან, განთავისუფლდა თავისუფლების აღკვეთის დაწესებულებიდან), განცხადებისა და შესაბამისი დოკუმენტაციის წარდგენის შემთხვევაში

(ცნობა საზღვრის გადაკვეთის შესახებ/ჩანაწერი პასპორტში, ცნობა სამკურნალო დაწესებულებიდან გამოწერის შესახებ, ცნობა თავისუფლების აღკვეთის დაწესებულებიდან განთავისუფლების შესახებ), მას რეგისტრაციაში გაატარებს კომისია განცხადების მიღებიდან 2 დღის ვადაში, ხოლო თუ კენჭისყრის დღემდე დარჩენილია 2 დღეზე ნაკლები – დაუყოვნებლივ (ამომრჩეველის მონაცემები შეიტანება ამომრჩეველთა სპეციალურ სიაში).

ყურადღება!

საოლქო საარჩევნო კომისიამ უარყოფითი გადაწყვეტილების შესახებ ამომრჩეველს უნდა აცნობოს დაუყოვნებლივ.

2.5. გადასატანი საარჩევნო ყუთის სია (საარჩევნო კოდექსი - მუხლი 33)

გადასატანი საარჩევნო ყუთის სიის ფორმირებაზე პასუხისმგებელია საუბნო საარჩევნო კომისია. გადასატანი საარჩევნო ყუთის სია დგება ერთიანი და სპეციალური სიების საფუძველზე.

ამომრჩეველი გადასატანი საარჩევნო ყუთის სიაში შეჰყავთ თუ:

- ▶ შეზღუდული შესაძლებლობის ან/და ჯანმრთელობის მდგომარეობის გამო არ შეუძლია კენჭისყრის შენობაში მისვლა (ასეთი ამომრჩევლების რაოდენობა არ უნდა აღემატებოდეს საარჩევნო უბანზე ერთიან სიაში არსებული ამომრჩევლების 3 პროცენტს. აღნიშნული რაოდენობის შევსების შემდეგ საუბნო საარჩევნო კომისიის თავმჯდომარე ვალდებულია ყოველი ახალი შემოსული განცხადების შესახებ დაუყოვნებლივ შეატყობინოს საოლქო საარჩევნო კომისიას);
- ▶ იმყოფება საარჩევნო უბნის ტერიტორიაზე, მაგრამ ძნელად მისადგომ ადგილას;

ყურადღება!

- ▶ ამომრჩეველი საუბნო საარჩევნო კომისიას წერილობით ან სატელეფონო შეტყობინებით, გადასატანი საარჩევნო ყუთის მეშვეობით ხმის მიცემის მოთხოვნით, მიმართავს კენჭისყრის დღემდე 2 დღით ადრე მაინც (24 აპრილი).
- ▶ კომისიის მდივანს ამომრჩეველი გადასატანი ყუთის სიაში შეყავს იმ შემთხვევაში, თუ იგი შეყვანილია ამომრჩეველთა ერთიან სიაში და მისი ფაქტობრივი ადგილსამყოფელი მიეკუთვნება იმ საარჩევნო უბნის ტერიტორიას, სადაც იგი რეგისტრირებულია.

- ▶ იმყოფება პატიმრობაში;
- ▶ სამკურნალოდ წევს საავადმყოფოში ან სხვა სტაციონარულ სამკურნალო დაწესებულებაში და მასში არ იხსნება საარჩევნო უბანი (კენჭისყრის დღეს სტაციონარულ სამკურნალო დაწესებულებაში მყოფი ამომრჩევლის შესახებ ინფორმაციას საოლქო საარჩევნო კომისია გადასცემს საუბნო საარჩევნო კომისიას კენჭისყრის დღემდე არა უგვიანეს 2 დღისა);

საარჩევნო სუბიექტების წარმომადგენლებს უფლება აქვთ, გადაამოწმონ გადასატანი საარჩევნო ყუთის მეშვეობით ხმის მიცემის მოთხოვნის საფუძველიანობა და არჩევნების დღემდე ნებისმიერ დროს დასვან საუბნო საარჩევნო კომისიის წინაშე ამ პირების გადასატანი საარჩევნო ყუთის სიაში შეყვანის მიზანშეწონილობის საკითხი. აღნიშნულ საკითხთან დაკავშირებით გადაწყვეტილებას იღებს საუბნო საარჩევნო კომისია.

ყურადღება!

გადასატანი საარჩევნო ყუთის სია მისი შედგენისთანავე თვალსაჩინო ადგილას გამოიკვერება საუბნო საარჩევნო კომისიისა და კენჭისყრის შენობებში.

პარტიების რეგისტრაცია

საქართველოს პარლამენტის შუალედურ არჩევნებში მონაწილეობის მიზნით პარტიამ/საარჩევნო ბლოკმა, რომელიც ცესკოში რეგისტრირებული იყო ბოლო საპარლამენტო არჩევნებისას, ასევე პარტიამ, რომელიც ბოლო საპარლამენტო არჩევნებისას რეგისტრირებული არ იყო ცესკოში, შუალედურ არჩევნებში მონაწილეობის უფლების მისაღებად ცენტრალურ საარჩევნო კომისიას თავისი ხელმძღვანელი პირის (პირების) მიერ ხელმოწერილი განცხადებით უნდა მიმართოს შუალედური არჩევნების დანიშვნის შემდეგ, მაგრამ არჩევნების დღემდე არა უგვიანეს 57-ე (1 მარტი) დღისა.

საარჩევნო ბლოკების რეგისტრაცია

რეგისტრირებულ პარტიებს უფლება აქვთ, შექმნან საარჩევნო ბლოკი. საარჩევნო ბლოკის რეგისტრაციისთვის არჩევნების დღემდე არა უგვიანეს 43-ე დღისა (15 მარტი) ცესკოს უნდა წარედგინოს ბლოკში შემავალი ყველა პარტიის უფლებამოსილი ხელმძღვანელი პირების მიერ ხელმოწერილი განცხადება და საარჩევნო ბლოკის წესდება.

ცესკოს სათანადო სამსახური ამოწმებს განცხადებასა და წესდებას და არა უგვიანეს ცესკოში განცხადების შეტანის მომდევნო დღისა დასკვნას წარუდგენს ცესკოს თავმჯდომარეს. ცესკოს თავმჯდომარე დასკვნის მიღებიდან არა უგვიანეს მომდევნო დღისა რეგისტრაციაში გაატარებს საარჩევნო ბლოკსა და მის წარმომადგენელს, თუ წარდგენილი საბუთები არ შეესაბამება მოთხოვნებს – წერილობით აცნობებს ბლოკის წარმომადგენელს შეუსაბამობის შესახებ (შეუსაბამობის მითითებით). შესწორებული საბუთები ცესკოს უნდა დაუბრუნდეს შეტყობინებიდან არა უგვიანეს მე-2 დღისა. რეგისტრაციის შესახებ საბოლოო გადაწყვეტილებას ცესკოს თავმჯდომარე იღებს შესწორებული საბუთების მიღებიდან 2 დღის ვადაში.

არჩევნების დღემდე არა უგვიანეს 30-ე დღისა (28 მარტი) ცესკო პრესიტა და მასობრივი ინფორმაციის სხვა საშუალებებით აქვეყნებს რეგისტრირებული პარტიებისა და საარჩევნო ბლოკების სიას განცხადებების წარდგენის რიგის მიხედვით, აგრეთვე იმ პარტიებისა და საარჩევნო ბლოკების სიას, რომელთაც უარი ეთქვათ რეგისტრაციაზე ან რომელთა რეგისტრაციაც გაუქმდა, და ამის მიზეზებს.

მოქალაქეთა საინიციატივო ჯგუფის რეგისტრაცია

საქართველოს პარლამენტის წევრობის კანდიდატის წარდგენის მიზნით ამომრჩეველთა საინიციატივო ჯგუფმა კენჭისყრამდე არა უგვიანეს 57-ე დღისა (1 მარტი), განცხადებით უნდა მიმართოს შესაბამის საოლქო საარჩევნო კომისიას. განცხადების წარდგენიდან არა უგვიანეს მომდევნო დღისა საოლქო საარჩევნო კომისიის თავმჯდომარე რეგისტრაციაში ატარებს ამომრჩეველთა საინიციატივო ჯგუფს.

კანდიდატების რეგისტრაცია

მაჟორიტარულ საარჩევნო ოლქში საქართველოს პარლამენტის წევრობის კანდიდატების წარდგენის უფლება აქვთ საარჩევნო კოდექსის შესაბამისად რეგისტრირებულ:

- ▶ არჩევნებში დამოუკიდებლად მონაწილე პარტიას;

- ▶ საარჩევნო ბლოკს;
- ▶ ამომრჩეველთა 5-კაციან საინიციატივო ჯგუფს.

კანდიდატის წარდგენის შესახებ განცხადებას ორ ეგზემპლარად უნდა ერთოდეს საქართველოს პარლამენტის წევრობის თითოეული კანდიდატის მიერ შევსებული და ხელმოწერილი სააღრიცხვო ბარათი, მისი ფოტოსურათი და ცნობა ნარკოლოგიური შემოწმების შესახებ.

ამომრჩეველთა საინიციატივო ჯგუფის წარმომადგენელმა კენჭისყრამდე არა უგვიანეს 50-ე დღისა (8 მარტი) შესაბამის საოლქო საარჩევნო კომისიას უნდა წარუდგინოს ზემოაღნიშნული დოკუმენტაცია, ასევე, კანდიდატის მხარდამჭერ ამომრჩეველთა სია და მაჟორიტარი დეპუტატობის კანდიდატის მიერ ცესკოს მიერ მითითებულ ანგარიშზე 5000-ლარიანი დეპოზიტის განთავსების დამადასტურებელი საბანკო დოკუმენტი.

საოლქო საარჩევნო კომისიის თავმჯდომარე საინიციატივო ჯგუფის მიერ წარდგენილ საქართველოს პარლამენტის წევრობის კანდიდატს განკარგულებით რეგისტრაციაში ატარებს არჩევნების დღემდე არა უგვიანეს 30-ე დღისა (28 მარტი), ხოლო არჩევნებში დამოუკიდებლად მონაწილე პარტიის/საარჩევნო ბლოკის მიერ წარდგენილ საქართველოს პარლამენტის წევრობის კანდიდატს - არჩევნების დღემდე არა უგვიანეს 25-ე დღისა (2 აპრილი) (თუ თანდართულ საბუთებში არსებული მონაცემები არ შეესაბამება კანონის მოთხოვნებს, პარტიას/საარჩევნო ბლოკს ეძლევა დამატებითი ვადა საბუთების სრულყოფისთვის. შესწორებული მონაცემები მოწმდება და საარჩევნო რეგისტრაციის საკითხი წყდება მათი წარდგენიდან 5 დღის ვადაში, მაგრამ არჩევნების დღემდე არა უგვიანეს მე-20 დღისა - 7 აპრილი).

2.7. დამკვირვებელი ორგანიზაციების რეგისტრაცია (საარჩევნო კოდექსი - მუხლი 39; 40)

არჩევნებზე დაკვირვების უფლება აქვთ ადგილობრივ და საერთაშორისო დამკვირვებელ ორგანიზაციებს, რომლებიც გაივლიან რეგისტრაციას საქართველოს საარჩევნო კოდექსით დადგენილი წესის შესაბამისად.

ადგილობრივი დამკვირვებელი ორგანიზაცია შეიძლება იყოს კენჭისყრის დღემდე არაუგვიანეს ერთი წლისა რეგისტრირებული ადგილობრივი არასამეწარმეო იურიდიული პირი, რომლის წესდებაც რეგისტრაციაში გატარების მომენტისათვის ითვალისწინებს არჩევნებზე მონიტორინგს, ან/და ადამიანის უფლებათა დაცვას.

საერთაშორისო დამკვირვებელი ორგანიზაცია შეიძლება იყოს სხვა სახელმწიფოს წარმომადგენელი, სხვა სახელმწიფოში რეგისტრირებული ორგანიზაცია ან საერთაშორისო ორგანიზაცია, რომლის სადამფუძნებლო დოკუმენტი/წესდება ითვალისწინებს არჩევნების მონიტორინგს, ადამიანის უფლებათა დაცვას და რომლის საქმიანობაც ეფუძნება შემდეგ **საერთაშორისოდ აღიარებულ პრინციპებს**:

- ▶ საქართველოს კანონმდებლობის, სუვერენიტეტისა და ადამიანის უფლებათა საერთაშორისო ნორმების პატივისცემა;
- ▶ საარჩევნო პროცესისათვის ხელის შეშლისგან თავის შეკავება;
- ▶ პოლიტიკური მიუკერძოებლობა;
- ▶ საარჩევნო პროცესის მონაწილეებისაგან ფინანსური დამოუკიდებლობა და დაფინანსების წყაროების გამჭვირვალობა;
- ▶ საერთაშორისო საარჩევნო დაკვირვების პრინციპების დეკლარაციით აღიარებული დებულებების დაცვა.

ადგილობრივ დამკვირვებელ ორგანიზაციას რეგისტრაციაში ატარებს:

- ▶ **საოლქო საარჩევნო კომისია**, თუ დაკვირვებას ახორციელებს ერთ საარჩევნო ოლქში;
- ▶ **ცესკო**, თუ დაკვირვებას ახორციელებს ერთზე მეტ საარჩევნო ოლქში.

დამკვირვებელმა ორგანიზაციამ არჩევნების დღემდე არაუგვიანეს მე-10 დღისა (17 აპრილი) განცხადებით უნდა მიმართოს შესაბამის საარჩევნო კომისიას და წარუდგინოს თავისი სადამფუძნებლო დოკუმენტის ან წესდების დამოწმებული ასლი. განცხადებაში უნდა აღინიშნოს იმ საარჩევნო ოლქის (ოლქების) დასახელება, რომელშიც ორგანიზაცია ახორციელებს დაკვირვებას.

საარჩევნო კომისია განცხადების მიღებიდან 5 დღის ვადაში წყვეტს ორგანიზაციის რეგისტრაციის საკითხს.

კენჭისყრამდე არაუგვიანეს მე-5 დღისა (22 აპრილი):

- ▶ **ცესკოს მიერ რეგისტრირებულმა** დამკვირვებელმა ორგანიზაციამ ცესკოს მდივანს უნდა წარუდგინოს ცესკოში, საოლქო და საუბნო საარჩევნო კომისიებში დანიშნულ დამკვირვებელთა სია (სიას უნდა დაერთოს ადგილობრივი დამკვირვებლების საქართველოს მოქალაქის პირადობის მოწმობის ასლები);
- ▶ **საოლქო საარჩევნო კომისიის მიერ რეგისტრირებულმა** დამკვირვებელმა ორგანიზაციამ საოლქო საარჩევნო კომისიის მდივანს უნდა წარუდგინოს საოლქო და საუბნო საარჩევნო კომისიებში დანიშნულ დამკვირვებელთა სია (სიაში უნდა აღინიშნოს დამკვირვებლის სახელი, გვარი, რეგისტრაციის ადგილი).

ადგილობრივი დამკვირვებელი ორგანიზაციის დამკვირვებელი შეიძლება იყოს საქართველოს მოქალაქე 18 წლის ასაკიდან, **გარდა:**

- ▶ სახელმწიფო-პოლიტიკური თანამდებობის პირისა;
- ▶ საქართველოს პარლამენტის წევრისა;
- ▶ ადგილობრივი თვითმმართველობის წარმომადგენლობითი ორგანოს – საკრებულოს წევრისა;
- ▶ ადგილობრივი თვითმმართველობის აღმასრულებელი ორგანოს ხელმძღვანელისა და მისი მოადგილისა;
- ▶ მოსამართლისა;
- ▶ საქართველოს შინაგან საქმეთა, თავდაცვისა და სასჯელაღსრულების, პრობაციისა და იურიდიული დახმარების საკითხთა სამინისტროების, დაზვერვის სამსახურისა და სახელმწიფო დაცვის სპეციალური სამსახურის თანამშრომლებისა;
- ▶ პროკურატურის თანამდებობის პირისა;
- ▶ საარჩევნო სუბიექტისა და მისი წარმომადგენლისა;
- ▶ საარჩევნო კომისიის წევრისა.

საარჩევნო კომისიის მდივანი ვალდებულია დამკვირვებელთა სიის წარდგენიდან არაუგვიანეს მე-2 დღისა რეგისტრაციაში გაატაროს კანონის მოთხოვნათა დაცვით წარდგენილი დამკვირვებელი (დამკვირვებლები) და ორგანიზაციას გადასცეს **დამკვირვებლის მოწმობა (მოწმობები)**, რომელიც იმავდროულად წარმოადგენს **სამკერდე ნიშანს**.

ცესკოში რეგისტრირებულ ადგილობრივ დამკვირვებელს უფლება აქვს, დაკვირვება განახორციელოს ყველა დონის ნებისმიერ საარჩევნო კომისიაში.

ადგილობრივი დამკვირვებელი ორგანიზაციის დამკვირვებელი **საოლქო საარჩევნო კომისიაში** და ის დამკვირვებელი, რომელიც დაკვირვებას ახორციელებს საარჩევნო ოლქის ტერიტორიაზე არსებულ საარჩევნო უბანში, უფლებამოსილია, კენჭისყრის დღეს დაკვირვება განახორციელოს შესაბამისი ოლქის ტერიტორიაზე არსებულ **ნებისმიერ საარჩევნო უბანში**.

ყურადღება!

ერთ ადგილობრივ დამკვირვებელ ორგანიზაციას უფლება აქვს, საარჩევნო უბანში ერთდროულად ჰყავდეს არა უმეტეს ერთი დამკვირვებლისა.

საერთაშორისო დამკვირვებელი ორგანიზაციის რეგისტრაციის წესი და ვადა

საერთაშორისო დამკვირვებელ ორგანიზაციას რეგისტრაციაში ატარებს **ცესკო**.

საერთაშორისო დამკვირვებელმა ორგანიზაციამ არჩევნების დღემდე არა უგვიანეს მე-7 დღისა (20 აპრილი) განცხადებით უნდა მიმართოს ცესკოს და წარუდგინოს დამფუძნებელი დოკუმენტის ასლი. თუ დამკვირვებელი (დამკვირვებლები) სხვა სახელმწიფოს ხელისუფლების ორგანოს წარმომადგენელია, მან უნდა წარადგინოს მხოლოდ განცხადება და რწმუნების დამადასტურებელი საბუთი.

ამასთანავე, ცესკო უფლებამოსილია ორგანიზაციის რეგისტრაციისას მოითხოვოს დამატებითი ინფორმაციის წარდგენა, რომელიც შესაძლებელს გახდის ორგანიზაციის საქმიანობის **საერთაშორისოდ აღიარებულ პრინციპებთან** შესაბამისობის დადგენას.

ცესკო განცხადების მიღებიდან 2 დღის ვადაში წყვეტს ორგანიზაციის რეგისტრაციის საკითხს.

კენჭისყრამდე არა უგვიანეს მე-2 დღისა (25 აპრილი) რეგისტრირებულმა საერთაშორისო დამკვირვებელმა ორგანიზაციამ ცესკოს მდივანს უნდა წარუდგინოს ინფორმაცია დამკვირვებელთა შესახებ და მათი პირადობის დამადასტურებელი დოკუმენტების ასლები.

ცესკოს მდივანი დამკვირვებელთა სიის წარდგენიდან არაუგვიანეს მე-2 დღისა გამოსცემს განკარგულებას წარდგენილი დამკვირვებლის (დამკვირვებლების) რეგისტრაციაში გატარების ან რეგისტრაციაში გატარებაზე უარის თქმის შესახებ. დამკვირვებლის (დამკვირვებლების) რეგისტრაციაში გატარების შემთხვევაში ცესკოს მდივანი ორგანიზაციას გადასცემს **დამკვირვებლის მოწმობას (მოწმობებს)**, რომელიც იმავედროულად წარმოადგენს **სამკერდე ნიშანს**.

ყურადღება!

ერთ საერთაშორისო დამკვირვებელ ორგანიზაციას უფლება აქვს, საარჩევნო უბანში ერთდროულად ჰყავდეს არა უმეტეს 2 საერთაშორისო დამკვირვებლისა.

რეგისტრაციაზე უარის თქმა

საარჩევნო კომისიას უფლება არა აქვს, დამკვირვებელ ორგანიზაციას უარი უთხრას რეგისტრაციაზე, თუ იგი აკმაყოფილებს საქართველოს საარჩევნო კოდექსით დადგენილ მოთხოვნებს.

საარჩევნო კომისიის განკარგულება რეგისტრაციაზე **უარის თქმის შესახებ დასაბუთებული უნდა იყოს** და ორგანიზაციას უნდა გადაეცეს გადაწყვეტილების მიღებიდან არა უგვიანეს მომდევნო დღისა.

2.8. პრესისა და მასობრივი ინფორმაციის სხვა საშუალებების წარმომადგენელთა აკრედიტაცია

რამდენიმე საარჩევნო ოლქის ტერიტორიაზე მომუშავე პრესისა და მასობრივი ინფორმაციის სხვა საშუალებათა წარმომადგენლების აკრედიტაციას ახორციელებენ **ცესკოს მდივანი** ან შესაბამისი **საოლქო საარჩევნო კომისიების მდივნები**.

მხოლოდ ერთი საარჩევნო ოლქის ტერიტორიაზე მომუშავე წარმომადგენლების აკრედიტაციას ახორციელებს შესაბამისი **საოლქო საარჩევნო კომისიის მდივანი**.

განცხადება აკრედიტაციის შესახებ წარედგინება შესაბამის საარჩევნო კომისიას კენჭისყრის დღემდე არა უგვიანეს მე-3 დღისა (24 აპრილი).

განცხადების წარდგენიდან 1 დღის ვადაში შესაბამისი საარჩევნო კომისიის მდივანი წყვეტს პრესისა და მასობრივი ინფორმაციის სხვა საშუალებათა წარმომადგენლების აკრედიტაციის საკითხს და აკრედიტებულ წარმომადგენლებს გადაწყვეტილების მიღებიდან 1 დღის ვადაში გადასცემს სათანადო მოწმობას. აკრედიტაციაზე უარის თქმის შემთხვევაში იმავე ვადაში გადასცემს სათანადო განკარგულებას (**განკარგულებაში უარი დასაბუთებული უნდა იყოს**).

2.9. წინასაარჩევნო კამპანია (საარჩევნო კოდექსი - მუხლი 45; 46)

წინასაარჩევნო კამპანია იწყება არჩევნების დანიშვნის მომენტიდან (*საარჩევნო კოდექსი - მუხლი 45*).

საარჩევნო სუბიექტებსა და მათ მხარდამჭერებს უფლება აქვთ, გამოვიდნენ მომავალი საქმიანობის პროგრამით. საარჩევნო პროგრამა არ უნდა შეიცავდეს ომისა და ძალადობის პროპაგანდას, არსებული სახელმწიფო და საზოგადოებრივი წყობილების ძალადობით შეცვლისკენ ან დამხობისკენ, საქართველოს ტერიტორიული მთლიანობის დარღვევისკენ, ეროვნული შუღლისა და მტრობისკენ, რელიგიური და ეთნიკური დაპირისპირებისკენ მოწოდებას.

წინასაარჩევნო აგიტაციის გაწევისა და აგიტაციაში მონაწილეობის უფლება არ აქვთ:

- ▶ საარჩევნო კომისიების წევრებს;
- ▶ მოსამართლეებს;
- ▶ საქართველოს შინაგან საქმეთა და თავდაცვის სამინისტროების, პროკურატურის, დაზვერვის სამსახურისა და სახელმწიფო დაცვის სპეციალური სამსახურის საჯარო მოხელეებს;
- ▶ გენერალურ აუდიტორს;
- ▶ საქართველოს სახალხო დამცველს;
- ▶ უცხო ქვეყნის მოქალაქესა და ორგანიზაციას;
- ▶ საქველმოქმედო და რელიგიურ ორგანიზაციებს;
- ▶ საქართველოს კომუნიკაციების ეროვნული კომისიისა და საქართველოს ენერგეტიკისა და წყალმომარაგების მარეგულირებელი ეროვნული კომისიის წევრებს;
- ▶ სახელმწიფო და ადგილობრივი თვითმმართველობის ორგანოების საჯარო მოხელეებს, როდესაც ისინი უშუალოდ ასრულებენ სამსახურებრივ ფუნქციებს (აღნიშნული შეზღუდვა არ ვრცელდება საარჩევნო კოდექსით გათვალისწინებულ პოლიტიკური თანამდებობის პირებზე¹ (*საარჩევნო კოდექსი - მუხლი 49.2*).

¹ პოლიტიკური თანამდებობის პირი – საქართველოს პრეზიდენტი, საქართველოს პარლამენტის წევრი, საქართველოს პრემიერ-მინისტრი, საქართველოს მთავრობის სხვა წევრები და მათი მოადგილეები, აფხაზეთისა და აჭარის ავტონომიური რესპუბლიკების უმაღლესი წარმომადგენლობითი ორგანოების წევრები, აფხაზეთისა და აჭარის ავტონომიური რესპუბლიკების მთავრობათა ხელმძღვანელები, აგრეთვე ადგილობრივი თვითმმართველობის წარმომადგენლობითი ორგანოს წევრი და აღმასრულებელი ორგანოს ხელმძღვანელი, სახელმწიფო რწმუნებული – გუბერნატორი.

ყურადღება!

საარჩევნო კამპანიის ჩატარება იკრძალება შემდეგი დაწესებულებების შენობებში:

- ▶ სასამართლოები;
- ▶ სამხედრო ნაწილები;
- ▶ საქართველოს აღმასრულებელი ხელისუფლების დაწესებულებები.

სააგიტაციო მასალა

(საარჩევნო კოდექსი - მუხლი 46)

საარჩევნო სუბიექტები (საარჩევნო სუბიექტობის კანდიდატები) სარგებლობენ თანასწორი უფლებებით დაამზადონ წინასაარჩევნო მოწოდებები, განცხადებები, წარწერები, ფურცლები, ფოტომასალები და სხვა.

ბეჭდვითი სააგიტაციო მასალები შეიძლება გამოიფინოს შენობა-ნაგებობებსა და სხვა ობიექტებზე მათი მესაკუთრეების ან მფლობელების თანხმობის შემთხვევაში.

აკრძალულია!

- ▶ სააგიტაციო მასალის გავრცელებისთვის ხელის შეშლა და ჩამორთმევა, აგრეთვე, სააგიტაციო დანიშნულების ავტოსატრანსპორტო და სპეციალური მოწყობილობით აღჭურვილ სხვა საშუალებათა ჩამორთმევა ან წინასაარჩევნო აგიტაციის მიზნით მათი გამოყენებისთვის ხელის შეშლა.
- ▶ საარჩევნო პლაკატების გაკვრა საკულტო ნაგებობებზე, კულტურული მემკვიდრეობის შენობა-ნაგებობებზე, სახელმწიფო ხელისუფლებისა და ადგილობრივი თვითმმართველობის ორგანოების, სასამართლოების, პროკურატურის, სამხედრო შენაერთებისა და პოლიციის შენობების ინტერიერსა და ექსტერიერში, საგზაო ნიშნებზე.
- ▶ დაუშვებელია და კანონით ისჯება საარჩევნო პლაკატების ჩამოხსნა, ჩამოხვევა, დაფარვა ან დაზიანება, თუ ისინი აკრძალულ ადგილებში არ არის გაკრული.

ბეჭდვითი სააგიტაციო მასალაზე აღნიშნული უნდა იყოს:

- ▶ დამამზადებელი და დამკვეთი ორგანიზაციების სახელწოდებები, მისამართები;
- ▶ ინფორმაცია მასალის ტირაჟის, რიგითი ნომრისა და გამოშვების თარიღის შესახებ.

ყურადღება!

- ▶ აკრძალულია ბეჭდვითი სააგიტაციო მასალის გავრცელება ამ ინფორმაციის მითითების გარეშე.
- ▶ ბეჭდვითი სააგიტაციო მასალაზე რიგითი ნომრის აღნიშვნა საარჩევნო სუბიექტს ევალება მხოლოდ მას შემდეგ, რაც მიენიჭება აღნიშნული ნომერი.

არჩევნების საბოლოო შედეგების ოფიციალურად გამოქვეყნებიდან 15 დღის ვადაში შესაბამისი საარჩევნო სუბიექტი ვალდებულია უზრუნველყოს სააგიტაციო მასალის ჩამოხსნა, წინააღმდეგ შემთხვევაში მას დაეკისრება საქართველოს კანონმდებლობით გათვალისწინებული პასუხისმგებლობა.

(საარჩევნო კოდექსი - მუხლი 47)

არჩევნების დანიშვნის შესახებ შესაბამისი სამართლებრივი აქტის გამოქვეყნებიდან არჩევნების საბოლოო შედეგების გამოქვეყნებამდე საარჩევნო სუბიექტებს, საარჩევნო სუბიექტობის კანდიდატებს და მათ წარმომადგენლებს **ეკრძალებათ** პირადად ან ვინმეს მეშვეობით:

- ▶ საქართველოს მოქალაქეებისათვის ფულადი სახსრების, საჩუქრებისა და სხვა მატერიალურ ფასეულობათა გადაცემა (მიუხედავად მათი ღირებულებისა);
- ▶ შეღავათიან ფასად საქონლის მიყიდვა;
- ▶ უფასოდ ნებისმიერი საქონლის (გარდა კანონით გათვალისწინებული სააგიტაციო მასალისა) მიწოდება ან გავრცელება;
- ▶ საქართველოს მოქალაქეების დაინტერესება ფულადი სახსრების, ფასიანი ქაღალდებისა და სხვა მატერიალურ ფასეულობათა გადაცემის დაპირებით (მიუხედავად მათი ღირებულებისა).

არჩევნების დანიშვნის შესახებ შესაბამისი სამართლებრივი აქტის გამოქვეყნებიდან არჩევნების საბოლოო შედეგების გამოქვეყნებამდე ფიზიკურ და იურიდიულ პირებს **ეკრძალებათ** პირადი ფულადი სახსრებით ან/და საარჩევნო სუბიექტის სახსრებით ისეთი სამუშაოს შესრულება ან მომსახურების გაწევა (გარდა „სახელმწიფო შესყიდვების შესახებ“ საქართველოს კანონით დადგენილი წესით მოპოვებული სამუშაოს შესრულებისა ან მომსახურების გაწევისა), რომელიც საქართველოს კანონმდებლობის შესაბამისად განეკუთვნება საქართველოს სახელმწიფო ხელისუფლების ან/და ადგილობრივი თვითმმართველობის ორგანოთა კომპეტენციას.

ყურადღება!

საარჩევნო სუბიექტს, რომელიც უშუალოდ ან თავისი წარმომადგენლის ან მის სასარგებლოდ მოქმედი ნებისმიერი სხვა ფიზიკური თუ იურიდიული პირის მეშვეობით ეწევა ზემოთ აღნიშნულ აკრძალულ საქმიანობას, ასეთი ფაქტების დადასტურების შემთხვევაში, სასამართლოს გადაწყვეტილებით უუქმდება რეგისტრაცია.

ადმინისტრაციული რესურსების გამოყენების აკრძალვა*(საარჩევნო კოდექსი - მუხლი 48)*

ადმინისტრაციული რესურსი არის მატერიალური ფასეულობა - ქონება, რომელიც აუცილებელია სახელმწიფოებრივი ფუნქციების შესასრულებლად. წინასაარჩევნო აგიტაციაში მონაწილეობის უფლების მქონე პირებს **ეკრძალებათ** შემდეგი სახის ადმინისტრაციული რესურსების **გამოყენება**:

- ▶ სახელმწიფო ხელისუფლებისა და ადგილობრივი თვითმმართველობის ორგანოების მიერ, აგრეთვე იმ ორგანიზაციების მიერ, რომლებიც ფინანსდებიან საქართველოს სახელმწიფო ბიუჯეტიდან, დაკავებული შენობების გამოყენება იმ შემთხვევაში, თუ სხვა საარჩევნო სუბიექტებს არა აქვთ იმავე ან ანალოგიური დანიშნულების შენობების იმავე პირობებით გამოყენების შესაძლებლობა;
- ▶ სახელმწიფო ხელისუფლების დაწესებულებებისათვის ან ადგილობრივი თვითმმართველობის ორგანოებისა და იმ ორგანიზაციებისათვის, რომლებიც ფინანსდებიან საქართველოს სახელმწიფო ბიუჯეტიდან, განკუთვნილი საკომუნიკაციო საშუალებების, საინფორმაციო მომსახურებისა და სხვადასხვა სახის ტექნიკის გამოყენება;
- ▶ სახელმწიფო ხელისუფლების ან ადგილობრივი თვითმმართველობის ორგანოების საკუთრებაში არსებული სატრანსპორტო საშუალებების უსასყიდლოდ ან შეღავათიანი პირობებით გამოყენება.

ყურადღება!

შეზღუდვა არ ვრცელდება საარჩევნო კოდექსით გათვალისწინებული პოლიტიკური თანამდებობის პირების მიერ მათი სამსახურებრივი ავტომატურობის გამოყენებაზე, გარდა სახელმწიფო რწმუნებულებისა - გუბერნატორებისა და ადგილობრივი თვითმმართველობის აღმასრულებელი ორგანოს ხელმძღვანელი პირებისა, რომლებიც არჩეული არ არიან პირდაპირი არჩევნების გზით.

საბიუჯეტო თანხების გამოყენების აკრძალვა

(საარჩევნო კოდექსი - მუხლი 49.3,4)

არჩევნების დანიშვნის დღიდან არჩევნების შედეგების შეჯამებამდე **აკრძალულია** ისეთი პროექტების განხორციელება, რომლებიც მანამდე არ იყო გათვალისწინებული სახელმწიფო/ადგილობრივ ბიუჯეტში, ასევე იმ საბიუჯეტო პროგრამების ზრდა, რომლებიც არჩევნებამდე გათვალისწინებული იყო ბიუჯეტით, არაგეგმური ტრანსფერების ინიცირება ან გეგმური ტრანსფერის ზრდა ადგილობრივ ბიუჯეტში.

ყურადღება!

ამ წესის დარღვევის შემთხვევაში უფლებამოსილ პირს შეუძლია მიმართოს სასამართლოს და მოითხოვოს ხარჯების შეჩერება.

წინასაარჩევნო კამპანიის პერიოდში **აკრძალულია** სახელმწიფო/ადგილობრივი ბიუჯეტის სახსრებით ისეთი ბეჭდვითი მასალის დამზადება, რომელშიც ასახულია ესა თუ ის საარჩევნო სუბიექტი ან მისი არჩევნებში მონაწილეობის რიგითი ნომერი, ან/და რომელიც შეიცავს ამა თუ იმ საარჩევნო სუბიექტის მხარდასაჭერ/საწინააღმდეგო მასალას. **ასევე აკრძალულია** წინასაარჩევნო კამპანიის პერიოდში სოციალურ რეკლამაში საარჩევნო სუბიექტის ან მისი რიგითი ნომრის გამოყენება.

თანამდებობრივი ან სამსახურებრივი მდგომარეობის გამოყენების აკრძალვა

(საარჩევნო კოდექსი - მუხლი 49.1,2,5)

წინასაარჩევნო აგიტაციაში მონაწილეობის უფლების მქონე პირს, რომელსაც სახელმწიფო ხელისუფლების ან ადგილობრივი ხელისუფლების ორგანოში უკავია თანამდებობა, **ეკრძალება** კამპანიის წარმოების პროცესში თავისი თანამდებობრივი ან სამსახურებრივი მდგომარეობის გამოყენება, რაც გულისხმობს:

- ▶ სამსახურებრივად დაქვემდებარებული ან სხვაგვარად დამოკიდებული პირის ჩაბმას ისეთ საქმიანობაში, რომელიც ხელს უწყობს კანდიდატის წარდგენას ან/და არჩევას;
- ▶ სახელმწიფო ხელისუფლების ან ადგილობრივი თვითმმართველობის ორგანოს მიერ დაფინანსებული სამსახურებრივი მივლინებების დროს ხელმოწერების შეგროვებას და წინასაარჩევნო აგიტაციის გაწევას;
- ▶ წინასაარჩევნო აგიტაციის გაწევას სამსახურებრივი ფუნქციების შესრულებისას.

ყურადღება!

შეზღუდვა არ მოქმედებს საარჩევნო კოდექსით გათვალისწინებული პოლიტიკური თანამდებობის პირებზე, აგრეთვე იმ შემთხვევაზე, როცა ხდება ტელერადიომაუწყებლობის მიერ წინასაარჩევნო აგიტაციისათვის გამოყოფილი დროის გამოყენება.

საარჩევნო სუბიექტთა რეგისტრაციის ვადის გასვლიდან კენჭისყრის დღის დამთავრებამდე აკრძალულია ადგილობრივი თვითმმართველობის ორგანოს, პოლიციისა და პროკურატურის ხელმძღვანელ თანამდებობის პირთა საკადრო გადაადგილება, გარდა მათი უფლებამოსილების ვადის გასვლის ან/და მათ მიერ კანონის დარღვევის შემთხვევებისა.

უწყებათაშორისი კომისია

(საარჩევნო კოდექსი - მუხლი 48.3-9)

საჯარო მოსამსახურეების მიერ საქართველოს საარჩევნო კანონმდებლობის დარღვევის პრევენციისა და დარღვევებზე რეაგირების მიზნით საქართველოს საარჩევნო კოდექსის საფუძველზე, 2012 წლის 18 მაისიდან საქართველოს ეროვნული უშიშროების საბჭოსთან შეიქმნა უწყებათაშორისი კომისია (შემდგომში - კომისია), რომლის შემადგენლობაში შედიან შინაგან საქმეთა, იუსტიციის, რეგიონალური განვითარების და ინფრასტრუქტურის, ფინანსთა, საგარეო საქმეთა სამინისტროებისა და ეროვნული უშიშროების საბჭოს აპარატის წარმომადგენლები.²

კომისიის საქმიანობაში სათათბირო ხმის უფლებით მონაწილეობენ კვალიფიციური საარჩევნო სუბიექტები, აგრეთვე პოლიტიკური გაერთიანებები, რომლებიც უწყებათაშორისი კომისიას მიაწვდიან ინფორმაციას საჯარო მოსამსახურეების მიერ საარჩევნო კანონმდებლობის დარღვევის შესახებ.

უწყებათაშორისი კომისიის საქმიანობის საჯაროობის უზრუნველყოფის მიზნით კომისიის სხდომაზე შესაძლოა მიწვეულ იქნენ ადგილობრივი და საერთაშორისო დამკვირვებელი ორგანიზაციების წარმომადგენლები.

დარღვევის ფაქტის დადასტურების შემთხვევაში კომისია უფლებამოსილია **რეკომენდაციით მიმართოს** ნებისმიერ საჯარო მოსამსახურეს, ადმინისტრაციულ ორგანოს, ცესკოს გონივრულ ვადაში შესაბამისი ღონისძიებების გატარების მოთხოვნით.

2.10. კენჭისყრის შენობის მოწყობა

კენჭისყრის პროცედურების ჩასატარებლად, საუბნო საარჩევნო კომისიის წევრები ვალდებული არიან კანონით დადგენილი წესების დაცვით, კენჭისყრამდე არა უგვიანეს ერთი დღისა, მოაწონ კენჭისყრის შენობა.

საუბნო საარჩევნო კომისიამ უნდა მოაწყოს:

(საარჩევნო კოდექსი - მუხლი 58.4.ა-გ)

- ▶ ამომრჩეველთა სარეგისტრაციო მაგიდები (ერთი სარეგისტრაციო მაგიდა ყოველ 300 ამომრჩეველზე (საარჩევნო კოდექსი - მუხლი 61.2.ე.ბ);
- ▶ ფარული კენჭისყრის კაბინები: ერთი კაბინა ყოველ 500 ამომრჩეველზე. კაბინის ერთი მხარე ღია უნდა იყოს ნახევრამდე, ხოლო ზედა ნახევარი ფარდით დაფარული. ფარული კენჭისყრის კაბინაში უნდა იყოს საწერი კალამი; ცესკოს მიერ დადგენილი საარჩევნო ბიულეტენის შევსების წესი; ამონარიდი კანონიდან, თუ რა შემთხვევაშია ბიულეტენი ბათილი;
- ▶ სპეციალური კონვერტების მაგიდა (უნდა იდგეს საარჩევნო ყუთთან ახლოს);
- ▶ აწყობილი საარჩევნო ყუთები (დალუქვის გარეშე).



² კომისიის შემადგენლობა და დებულება იხ. შემდეგ ბმულზე: <http://nsc.gov.ge/files/files/media/NSC%20Advisor%20Order.pdf>

კენჭისყრის შენობაში გამჭვირვალე საარჩევნო ყუთი თვალსაჩინო ადგილზე მოთავსებული უნდა იყოს ისე, რომ ამომრჩეველი დაუბრკოლებლად მივიდეს მასთან და კონვერტის ჩაშვების შემდეგ დაუყოვნებლივ დატოვოს საარჩევნო უბანი.

საუბნო საარჩევნო კომისია, ეტლით მოსარგებლე შეზღუდული შესაძლებლობების მქონე ამომრჩევლების მიერ კენჭისყრის დღემდე არა უგვიანეს 25-ე დღის (2 აპრილი) მიმართვის შემთხვევაში, კენჭისყრის დღემდე არა უგვიანეს 20-ე დღისა (7 აპრილი) მიმართავს სახელმწიფო ხელისუფლებისა და ადგილობრივი თვითმმართველობის ორგანოებს, რომ მათ უზრუნველყონ კენჭისყრის ადგილის დროებითი, მარტივი ადაპტაცია (საარჩევნო კოდექსი - მუხლი 58.3).



საარჩევნო უბანში თვალსაჩინო ადგილას გამოკრული უნდა იყოს:

(საარჩევნო კოდექსი - მუხლი 58.4.დ; 58.5)

- ▶ ამომრჩეველთა სიები;
- ▶ არჩევნებში მონაწილე კანდიდატების სია;
- ▶ ცესკოს მიერ დადგენილი საარჩევნო ბიულეტენის შევსების წესი;
- ▶ ამონარიდი კანონიდან, თუ რა შემთხვევაშია ბიულეტენი ბათილი;
- ▶ კენჭისყრის შედეგების სადემონსტრაციო ოქმი.

თავი 3

კენჭისყრის დღე

ძირითადი აქტივობები

- | | |
|------|--|
| 3.1. | საარჩევნო უბნის გახსნა |
| 3.2. | კენჭისყრის პროცესი |
| 3.3. | საარჩევნო უბნის დახურვა, კენჭისყრის შედეგების შეჯამება |

3.1. საარჩევნო უბნის გახსნა

საარჩევნო უბანი იხსნება კენჭისყრის დღის 07:00 საათზე. თუ ამ დროისთვის კომისიის წევრთა რაოდენობა შვიდზე ნაკლები აღმოჩნდა, აღნიშნული ინფორმაცია დაუყოვნებლივ მიეწოდება საოლქო საარჩევნო კომისიას, რომელიც იღებს შესაბამის გადაწყვეტილებას (საარჩევნო კოდექსი - მუხლი 61.1).

საუბნო საარჩევნო კომისიის წევრები ვალდებული არიან კენჭისყრის დღის განმავლობაში ატარონ მათთვის განკუთვნილი სპეციალური ფორმები. აღნიშნული მოთხოვნის შეუსრულებლობა ზემდგომი საარჩევნო კომისიის მიერ განხილულ იქნება როგორც



დისციპლინური გადაცდომა და წარმოადგენს დისციპლინური პასუხისმგებლობის დაკისრების საფუძველს.

შენობაში ყოფნის უფლების მქონე პირები

(საარჩევნო კოდექსი - მუხლი 8.16; 39.3,6; 42.5; 44.5)

კენჭისყრის შენობაში ყოფნის უფლება აქვთ:

- ▶ საუბნო საარჩევნო კომისიის წევრებს;
- ▶ ზემდგომი საარჩევნო კომისიის წევრებს/წარმომადგენლებს;
- ▶ საარჩევნო სუბიექტების წარმომადგენლებს (ერთი და იმავე საარჩევნო სუბიექტის არაუმეტეს 1 წარმომადგენელს);
- ▶ რეგისტრირებული ადგილობრივი დამკვირვებელი ორგანიზაციის დამკვირვებლებს (ერთი და იმავე ადგილობრივი დამკვირვებელი ორგანიზაციის არაუმეტეს 1 დამკვირვებელს);
- ▶ რეგისტრირებული საერთაშორისო ორგანიზაციის დამკვირვებლებს (ერთი და იმავე საერთაშორისო ორგანიზაციის არაუმეტეს 2 დამკვირვებელს (დამატებით შესაძლოა ახლდეს თარჯიმანი);
- ▶ მედიის აკრედიტებულ წარმომადგენლებს (პრესისა და მასობრივი ინფორმაციის ერთი და იმავე საშუალების არაუმეტეს 3 წარმომადგენელს);
- ▶ ამომრჩეველთა სიების დაზუსტების უზრუნველყოფის კომისიის წევრებსა და რეგიონალური წარმომადგენლობების უფროსებს, რომლებიც უფლებამოსილები არიან კომისიის გადაწყვეტილების საფუძველზე განხორციელონ ამომრჩეველთა ერთიანი სიის მონიტორინგი კენჭისყრის დღეს საარჩევნო უბნებზე.



ყურადღება!

კენჭისყრის შენობაში ყოფნის უფლების მქონე ყველა პირს აუცილებლად უნდა ეკეთოს მისი ვინაობისა და სტატუსის დამადასტურებელი სამკერდე ნიშანი.

საარჩევნო უბნის გახსნიდან კენჭისყრის დაწყებამდე ჩასატარებელი პროცედურები

(საარჩევნო კოდექსი - მუხლი 61-62)

საარჩევნო უბნის გახსნიდან კენჭისყრის დაწყებამდე პროცედურები ტარდება შემდეგი თანმიმდევრობით:

I

საარჩევნო უბნის გახსნისთანავე იხსნება კენჭისყრის დღის ჩანაწერთა წიგნი (საარჩევნო კოდექსი - მუხლი 61.2.ა).

კომისიის თავმჯდომარე, საარჩევნო უბნის გახსნისთანავე, კენჭისყრის დღის ჩანაწერთა წიგნს გადასცემს საუბნო საარჩევნო კომისიის მდივანს. კომისიის მდივანი ვალდებულია, კომისიის თავმჯდომარესთან ერთად, აღრიცხოვს კენჭისყრის დღის ყველა საარჩევნო პროცედურა და მიუთითოს მათი განხორციელების დრო (საარჩევნო კოდექსი - მუხლი 62.3).

ჩანაწერთა წიგნის პირველ და მეორე გვერდებზე კომისიის მდივანს შეაქვს კენჭისყრის შენობაში მყოფი კომისიის ყველა წევრის სახელი და გვარი (მათი წარმდგენი სუბიექტის მითითებით) და კენჭისყრის შენობაში ყოფნის უფლების მქონე ყველა პირის მონაცემები (სახელი, გვარი, წარმდგენი ორგანიზაცია ან საარჩევნო სუბიექტი) და ხელმოწერით ამოწმებინებს მათ.

II კომისიის თავმჯდომარე ამოწმებს დალუქული პაკეტის მთლიანობას, რომელშიც მოთავსებულია საუბნო საარჩევნო კომისიის სპეციალური ბეჭედი, ხსნის დალუქულ პაკეტს და ბეჭედს უკეთებს პირველ ნაკვეთურს, რომლის ნიმუშიც აისახება კენჭისყრის დღის ჩანაწერთა წიგნში (*საარჩევნო კოდექსი - მუხლი 61.2.ბ*).

III კომისიის თავმჯდომარე ატარებს წილისყრას ფუნქციათა გასანაწილებლად.

საუბნო საარჩევნო კომისიის წევრებს შორის გასანაწილებელი ფუნქციებია:

- ▶ ამომრჩეველთა ნაკადის მომწესრიგებელი;
- ▶ ამომრჩეველთა რეგისტრატორი (არანაკლებ ერთი რეგისტრატორი ყოველ 300 ამომრჩეველზე);
- ▶ საარჩევნო ყუთისა და სპეციალური კონვერტების ზედამხედველი;
- ▶ გადასატანი საარჩევნო ყუთის წამლები კომისიის 2 წევრი, რომლებიც არ უნდა იყვნენ ერთი საარჩევნო სუბიექტის მიერ წარდგენილი საარჩევნო კომისიის წევრები.

ყურადღება!

წილისყრაში არ მონაწილეობენ კომისიის თავმჯდომარე/მოადგილე/კომისიის მდივანი.

საუბნო საარჩევნო კომისიის თავმჯდომარემ წილისყრის ჩატარებამდე უნდა შეაღდაროს საუბნო საარჩევნო კომისიის წევრების რაოდენობა და გასანაწილებელი ფუნქციების რაოდენობა.

იმ შემთხვევაში, თუ წილისყრის ჩატარების დროს დამსწრე კომისიის წევრთა რაოდენობა აღმოჩნდება გასანაწილებელ ფუნქციებზე:

- ▶ **1-ით ნაკლები**, მცირდება ამომრჩეველთა რეგისტრატორი კომისიის წევრების რაოდენობა;
- ▶ **2-ით ნაკლები**, კომისიის თავმჯდომარის მოადგილე ასრულებს კენჭისყრის ოთახში ამომრჩეველთა ნაკადის მომწესრიგებელი კომისიის წევრის ფუნქციას;
- ▶ **3-ით ნაკლები**, კომისიის თავმჯდომარე ასრულებს საარჩევნო ყუთისა და სპეციალური კონვერტების ზედამხედველი კომისიის წევრის ფუნქციას.

პირველ რიგში, კომისიის თავმჯდომარე ატარებს **წილისყრას გადასატანი საარჩევნო ყუთის წამლები 2 წევრის გამოსავლენად**.

ყურადღება!

წილისყრით გამოვლენილი პირები არ შეიძლება იყვნენ ერთი საარჩევნო სუბიექტის მიერ წარდგენილი კომისიის წევრები (*საარჩევნო კოდექსი - მუხლი 61.2.დ*).

საუბნო საარჩევნო კომისიის თავმჯდომარე:

- ▶ აანალიზებს პარტიების მიერ დანიშნული კომისიის რამდენი წევრი მონაწილეობს წილისყრის პროცესში;
- ▶ მათი რაოდენობის შესაბამისად ამზადებს ერთი ფორმისა და სახეობის ფურცლებს;
- ▶ 2 ფურცელზე, ერთი და იმავე საწერი კალმით წერს ფუნქციის დასახელებას “გადასატანი საარჩევნო ყუთის წამლები”;
- ▶ წილისყრის ფურცლებს ამოწმებს კომისიის სპეციალური ბეჭდით;
- ▶ ფურცლებს კეცავს იმგვარად, რომ შეუძლებელი იყოს ტექსტის წაკითხვა და ათავსებს მაგიდაზე;
- ▶ წილისყრაში მონაწილე კომისიის წევრები სათითაოდ იღებენ წილისყრის ფურცლებს.



ყურადღება!

- ▶ თუ პარტიის მიერ დანიშნული კომისიის წევრი უარს აცხადებს წილისყრაში მონაწილეობაზე, წილისყრა ტარდება პარტიების მიერ დანიშნულ დანარჩენ კომისიის წევრებს შორის.
- ▶ თუ წილისყრაში მონაწილე პარტიების მიერ დანიშნულ წევრთა რაოდენობა არ აღემატება ორს და ისინი არ არიან ერთი და იმავე საარჩევნო სუბიექტის მიერ დანიშნული წევრები, ამ შემთხვევაში წილისყრა არ ტარდება. გასანაწილებელი ფუნქცია მათ ავტომატურად მიენიჭებათ (თანხმობის საფუძველზე).
- ▶ თუ პარტიის მიერ დანიშნული კომისიის წევრები უარს აცხადებენ წილისყრაში მონაწილეობაზე ან წილისყრაში მონაწილე წევრთა რაოდენობა გასანაწილებელ ფუნქციებთან მიმართებაში ნაკლებია, წილისყრაში მონაწილეობას მიიღებენ კომისიის სხვა წევრებიც.
- ▶ თუ პარტიის მიერ დანიშნული წევრი უარს განაცხადებს წილისყრის შედეგად განაწილებული ფუნქციის შესრულებაზე, კომისიის თავმჯდომარე მას ჩაანაცვლებს წილისყრის შედეგად ფუნქციის გარეშე დარჩენილი კომისიის ნებისმიერი წევრით (სასურველია პარტიის მიერ დანიშნული წევრით).

კომისიის მდივანს წილისყრის შედეგი შეაქვს ჩანაწერთა წიგნის მე-3 გვერდზე.

გადასატანი საარჩევნო ყუთის წამლებ კომისიის წევრთა გამოვლენის შემდეგ, კომისიის თავმჯდომარე ატარებს წილისყრას სხვა ფუნქციების გასანაწილებლად.

საუბნო საარჩევნო კომისიის თავმჯდომარე:

- ▶ აანალიზებს კომისიის რამდენი წევრი მონაწილეობს წილისყრის პროცესში;
- ▶ მათი რაოდენობის შესაბამისად ამზადებს ერთი ფორმისა და სახეობის ფურცლებს;
- ▶ ფურცელზე, ერთი და იმავე საწერი საშუალებით წერს ფუნქციის დასახელებას “ნაკადის მომწესრიგებელი”, “რეგისტრატორი”, “საარჩევნო ყუთისა და სპეციალური კონვერტების ზედამხედველი”;
- ▶ წილისყრის ფურცლებს ამოწმებს კომისიის სპეციალური ბეჭდით;
- ▶ ფურცლებს კეცავს იმგვარად, რომ შეუძლებელი იყოს ტექსტის წაკითხვა და ათავსებს მაგიდაზე;
- ▶ წილისყრის მონაწილე კომისიის წევრები სათითაოდ იღებენ წილისყრის ფურცლებს.

კომისიის მდივანს წილისყრის შედეგები შეაქვს ჩანაწერთა წიგნის მე-3 გვერდზე.

კომისიის წევრის წილისყრით დადგენილი ფუნქციის დროებით გადაცემა კომისიის სხვა წევრისთვის შეიძლება მხოლოდ კომისიის თავმჯდომარის ნებართვით, რასაც კომისიის მდივანი აღნიშნავს კენჭისყრის დღის ჩანაწერთა წიგნის მე-5 გვერდზე (საარჩევნო კოდექსი - 61.2.ზ).

თუ კომისიის რომელიმე წევრი, კომისიაში გამოცხადდა წილისყრის პროცედურის დასრულების შემდეგ, მისთვის ფუნქციის მინიჭების საკითხს წყვეტს საუბნო საარჩევნო კომისიის თავმჯდომარე, ხოლო მისი შრომის ანაზღაურების საკითხს - საოლქო საარჩევნო კომისია (საარჩევნო კოდექსი - მუხლი 61.4).

IV საუბნო საარჩევნო კომისიის თავმჯდომარე საარჩევნო უბანზე მყოფი საარჩევნო სუბიექტების წარმომადგენლებისაგან წილისყრით გამოავლენს არა უმეტეს 2 წარმომადგენელს, რომლებიც დააკვირდებიან საჩივრების რეგისტრაციის პროცესს. (საარჩევნო კოდექსი - მუხლი 61.5).


ყურადღება!

წილისყრაში არ მონაწილეობენ კომისიის მდივნის წარმდგენი პარტიის, აგრეთვე საარჩევნო ბლოკის, რომელშიც ასეთი პარტიაა, მიერ დანიშნული წარმომადგენლები (საარჩევნო კოდექსი - მუხლი 61.5).


V კომისიის თავმჯდომარე აცხადებს ამომრჩეველთა რაოდენობას სიების მიხედვით, მიღებული საარჩევნო ბიულეტენებისა და სპეციალური კონვერტების რაოდენობას (საარჩევნო კოდექსი - მუხლი 61.6.ა-ბ).



VI კომისიის თავმჯდომარე ამოწმებს და ინდივიდუალური ნომრის მქონე ლუქით ლუქავს ძირითად და გადასატან საარჩევნო ყუთებს (საარჩევნო კოდექსი - მუხლი 61.6.გ).



VII კომისიის თავმჯდომარე კომისიის წევრებს გადასცემს მასალებს.



კომისიის თავმჯდომარე ამომრჩეველთა რეგისტრატორებს გადასცემს:

- ▶ ანბანის მიხედვით დანაწილებულ ამომრჩეველთა ერთიან სიას, ერთ-ერთ რეგისტრატორს აგრეთვე გადასცემს ამომრჩეველთა სპეციალურ სიას (ასეთის არსებობის შემთხვევაში);
- ▶ მაჟორიტარული საარჩევნო ბიულეტენების თითო ბლოკნოტს;
- ▶ წილისყრით გამოვლენილ რეგისტრატორის ბეჭედს, რომელსაც გადაცემამდე უკეთებს პირველ ნაკვეთურს (ბეჭდის ნიმუში აისახება ჩანაწერთა წიგნში) (საარჩევნო კოდექსი - მუხლი 61.8);
- ▶ მარკირების სითხეს.

ყურადღება!

თავმჯდომარემ თითოეულ სარეგისტრაციო მაგიდასთან უნდა გამოაკრას ამომრჩეველთა გვარების ანბანური თანმიმდევრობა მაგიდაზე განლაგებული სიების შესაბამისად.

კომისიის თავმჯდომარე ამომრჩეველთა ნაკადის მომწესრიგებელ კომისიის წევრს გადასცემს მარკირების შესამოწმებელ ულტრაიისფერ ფარანს.



კომისიის თავმჯდომარე საარჩევნო ყუთისა და სპეციალური კონვერტების ზედამხედველ კომისიის წევრს გადასცემს ძირითად საარჩევნო ყუთს და სპეციალურ კონვერტებს.



VIII ივსება საკონტროლო ფურცელი (საარჩევნო კოდექსი - მუხლი 61.10).

კენჭისყრის დაწყებამდე კომისიის თავმჯდომარე და მდივანი ავსებენ საკონტროლო ფურცლებს (გარდა პირველი ამომრჩევლის შესახებ მონაცემებისა). საუბნო საარჩევნო კომისიის ყველა დამსწრე წევრი ხელს აწერს საკონტროლო ფურცელს.

ყურადღება!

კომისიის წევრებისათვის მასალების გადაცემის შემდეგ დაუყოვნებლივ, კენჭისყრის დაწყებამდე, უნდა შეივსოს საკონტროლო ფურცელი (ნუ დაელოდებით პირველ ამომრჩეველს).

პირველი ამომრჩეველის მოსვლისას ამომრჩეველი გადის რეგისტრაციას, იღებს ბიულეტენს, რის შემდეგაც კომისიის მდივანს საკონტროლო ფურცელში შეაქვს პირველი ამომრჩეველის მონაცემები.

კომისიის თავმჯდომარე საკონტროლო ფურცლის ერთ ეგზემპლარს აგდებს ძირითად საარჩევნო ყუთში, მეორე ეგზემპლარს – გადასატან საარჩევნო ყუთში (არსებობის შემთხვევაში), ხოლო მესამე ეგზემპლარს ინახავს საარჩევნო ყუთებში არსებულ საკონტროლო ფურცლებთან შემდგომი შედარების მიზნით.

საკონტროლო ფურცლის მონაცემები შეიტანება კენჭისყრის დღის ჩანაწერთა წიგნის მე-4 გვერდზე.

ყურადღება!

პირველი ამომრჩეველის მიერ რეგისტრაციის გავლის შემდეგ, კომისიის თავმჯდომარე საოლქო საარჩევნო კომისიას აცნობებს ყუთ(ებ)ის დალუქვის, საკონტროლო ფურცლ(ებ)ის ყუთ(ებ)ში ჩაგდების, კომისიის სპეციალურ ბეჭედსა და რეგისტრატორების ბეჭედებზე პირველი ნაკვეთურის გაკეთებისა და ნაკვეთურის ნიმუშის კენჭისყრის დღის ჩანაწერთა წიგნში ასახვის შესახებ.

3.2. კენჭისყრის პროცესი

კენჭისყრის ჩატარება

(საარჩევნო კოდექსი - მუხლი 64-65)

კენჭისყრა ტარდება კენჭისყრის დღის (27 აპრილი) 08:00 საათიდან 20:00 საათამდე. ხმის მიცემის პროცედურა ტარდება შემდეგი წესისა და თანმიმდევრობის დაცვით:

I

კენჭისყრის ოთახში შესვლისას ამომრჩეველი ნაკადის მომწესრიგებელთან გადის მარკირების შემოწმების პროცედურას.



ამომრჩეველთა ნაკადის მომწესრიგებელი:

- ▶ არეგულირებს საარჩევნო უბანში შემოსული ამომრჩევლების ნაკადს;
- ▶ სთხოვს ამომრჩეველს წარმოადგინოს საქართველოს მოქალაქის პირადობის მოწმობა/ID ბარათი ან საქართველოს მოქალაქის პასპორტი;

ყურადღება!

საქართველოს საარჩევნო კოდექსის 185¹ მუხლით დადგენილი წესით არჩევნებში ხმის მიცემის უფლება აქვს საარჩევნო სიაში რეგისტრირებულ ევროკავშირის წევრი სახელმწიფოს მოქალაქეს, რომელიც დაბადებულია და ბოლო 5 წლის განმავლობაში მუდმივად ცხოვრობს საქართველოში. ასეთი პირი საარჩევნო უბანზე მისვლისას საქართველოს მოქალაქის პასპორტისა და პირადობის მოწმობის ნაცვლად წარადგენს ევროკავშირის წევრი სახელმწიფოს პასპორტს.

- ▶ ულტრაიისფერი ფარნით ამოწმებს, აღენიშნება თუ არა ამომრჩეველს მარკირება;
- ▶ ამოწმებს, თუ რამდენი ამომრჩეველი დგას ამომრჩევლისთვის განკუთვნილ სარეგისტრაციო მაგიდასთან. თუ სარეგისტრაციო მაგიდასთან ორზე მეტი ამომრჩეველი დგას, დროებით აყოვნებს კენჭისყრის ოთახში მორიგი ამომრჩეველის შესვლას;

- ▶ მიუთითებს ამომრჩეველს, მივიდეს იმ სარეგისტრაციო მაგიდასთან, რომელსაც მიეკუთვნება ამომრჩეველთა სიაში მისი გვარის პირველი ასო.

ყურადღება!


თუ ხელსაწყომ გამოავლინა, რომ ამომრჩეველს უკვე აქვს მარკირება, მას ეკრძალება კენჭისყრაში მონაწილეობა, ხოლო მისი ვინაობა შეიტანება ჩანაწერთა წიგნში.

II

ამომრჩეველი რეგისტრატორთან გადის რეგისტრაციას.

ამომრჩეველთა რეგისტრატორი:

- ▶ სთხოვს ამომრჩეველს, წარმოადგინოს საქართველოს მოქალაქის პირადობის მოწმობა/ID ბარათი ან საქართველოს მოქალაქის პასპორტი, (საქართველოს ოკუპირებული ტერიტორიიდან იძულებით გადაადგილებული პირის შემთხვევაში – დევნილის მოწმობა საქართველოს მოქალაქის პირადობის მოწმობასთან ერთად). ერთიან სიაში რეგისტრირებულ ევროკავშირის წევრი სახელმწიფოს მოქალაქეს სთხოვს წარმოადგინოს ევროკავშირის წევრი სახელმწიფოს პასპორტი;



ყურადღება!

თუ ერთიან სიაში ამომრჩეველის მონაცემები არ მოიძებნა, რეგისტრატორი ვალდებულია ამომრჩეველს მიუთითოს, მიმართოს ბოლო რეგისტრატორს მისი მონაცემების გადასამოწმებლად. აღნიშნული რეგისტრატორი ამომრჩეველის მონაცემებს ამოწმებს ამომრჩეველთა სიაში ანბანურად დალაგებული სიების შემდეგ შეყვანილ ამომრჩეველთა მონაცემებში, ჩანაწერით – „რეგისტრაციის მისამართიდან მოხსნილია“ (ასეთის არსებობის შემთხვევაში).

ყურადღება!

თუ საარჩევნო უბანზე გამოცხადდა ამომრჩეველი, რომელსაც ერთიან სიაში მინიჭებული აქვს სტატუსი „არის საზღვარგარეთ“, აღნიშნული ამომრჩეველი კენჭისყრაში მონაწილეობას მიიღებს ზოგადი წესით.

- ▶ ამომრჩეველთა სიაში ამომრჩეველის ყოფნის დადასტურების შემთხვევაში ახორციელებს მის მარკირებას (მარკირება არ გამოიყენება პატიმრობის/თავისუფლების აღკვეთის დაწესებულებებში, საავადმყოფოებსა და სხვა სამკურნალო დაწესებულებებში);

ყურადღება!

მარკირების პროცედურის გავლაზე უარის თქმის შემთხვევაში ამომრჩეველს არ აქვს კენჭისყრაში მონაწილეობის უფლება და მასზე საარჩევნო ბიულეტენი არ გაიცემა.


- ▶ აკეთებს ხელმოწერას ამომრჩეველთა ერთიანი სიის სათანადო გრაფაში, ხოლო შემდეგ ამომრჩეველი ხელმოწერით ადასტურებს საარჩევნო ბიულეტენის მიღებას;
- ▶ საარჩევნო ბიულეტენის გაცემისას ხელს აწერს მის უკანა გვერდზე სათანადო გრაფაში და ბიულეტენს ამოწმებს სპეციალური ბეჭდით.

ყურადღება!

რეგისტრატორის ფუნქციის გადაცემის შემთხვევაში, რეგისტრატორი ვალდებულია გადაითვალოს სიებში ამომრჩეველთა ხელმოწერებისა და მის მიერ გაცემული ბიულეტენების რაოდენობა (თავმჯდომარისთვის გადაცემული გაფუჭებული ბიულეტენების ჩათვლით) და შედეგები აცნობოს თავმჯდომარეს. ტოლობის არ არსებობის შემთხვევაში უნდა დაწეროს ახსნა-განმარტება, რომელიც დაერთდება კენჭისყრის შედეგების შემაჯამებელ ოქმს.

III

ამომრჩეველი შედის ფარული კენჭისყრის კაბინაში და ავსებს ბიულეტენს. საარჩევნო ბიულეტენის შევსებისას აკრძალულია სხვა პირის დასწრება.



ყურადღება!

- ▶ თუ ამომრჩეველს არ შეუძლია დამოუკიდებლად შეავსოს საარჩევნო ბიულეტენი, მას უფლება აქვს, ფარული კენჭისყრის კაბინაში დასახმარებლად მიიწვიოს ნებისმიერი პირი, გარდა საარჩევნო კომისიის წევრისა, კანდიდატისა, საარჩევნო სუბიექტის წარმომადგენლისა და დამკვირვებლისა (*საარჩევნო კოდექსი - მუხლი 65.3*).
- ▶ თუ ამომრჩეველს ან საუბნო საარჩევნო კომისიის წევრს გაუფუჭდა საარჩევნო ბიულეტენი ან სპეციალური კონვერტი, მათ ამის შესახებ უნდა აცნობონ კომისიის თავმჯდომარეს. კომისიის თავმჯდომარის დავალებით, რეგისტრატორი ვალდებულია ამომრჩეველს შეუცვალოს გაფუჭებული ბიულეტენი ახლით. კომისიის თავმჯდომარე გაფუჭებულ ბიულეტენს, ამომრჩევლის თანდასწრებით, ჩამოაჭრის კუთხეს, დააწერს „გაფუჭებულია“ და აწერს ხელს. კომისიის თავმჯდომარე გაფუჭებულ ბიულეტენს ინახავს ცალკე (*საარჩევნო კოდექსი - მუხლი 65.4*).

IV

ამომრჩეველი მიდის განცალკევებით მდგარ მაგიდასთან და სპეციალური კონვერტების ზედამხედველის მითითებით იღებს სპეციალურ კონვერტს, ათავსებს მასში ბიულეტენს.



საარჩევნო ყუთისა და სპეციალური კონვერტების ზედამხედველი:

მას შემდეგ, რაც დარწმუნდება, რომ ამომრჩეველს ხელში მხოლოდ ერთი კონვერტი აქვს, ხსნის საარჩევნო ყუთის ჭრილს და მიუთითებს ამომრჩეველს მოათავსოს სპეციალური კონვერტი საარჩევნო ყუთში.

V

ამომრჩეველი სპეციალურ კონვერტს აგდებს საარჩევნო ყუთში.

ყურადღება!

- ▶ საარჩევნო ყუთთან ერთდროულად ერთზე მეტი ამომრჩეველის მისვლა არ შეიძლება.
- ▶ დამკვირვებელს, საარჩევნო სუბიექტის წარმომადგენელს უფლება აქვს დააკვირდეს საარჩევნო ყუთს, საარჩევნო ყუთში სპეციალური კონვერტების ჩაყრას.

VI

კონვერტის ყუთში ჩაშვების შემდეგ ამომრჩეველი ტოვებს საარჩევნო უბანს.

ფიზიკური მდგომარეობის გამო ამომრჩევლის მიერ ხმის მიცემის პროცედურა

(საქართველოს ცენტრალური საარჩევნო კომისიის 2012 წლის 21 ივნისის №20/2012 დადგენილება)

ამომრჩეველი, რომელიც ზედა კიდურების არ ქონის გამო ვერ ახერხებს ხმის მიცემის პროცედურების (მარკირება, ხელისმოწერა ბიულეტენის მიღებაზე, ბიულეტენის მოთავსება საარჩევნო ყუთში) დამოუკიდებლად შესრულებას (ფიზიკური მდგომარეობა) კენჭისყრაში მონაწილეობს შემდეგი პროცედურების გათვალისწინებით:

- ▶ ამომრჩეველი არ გადის მარკირების შემოწმებისა და მარკირების პროცედურას;
- ▶ მასზე საარჩევნო ბიულეტენის გაცემისას ამომრჩეველთა რეგისტრატორი, ამომრჩეველთა ერთიანი სიის გრაფაში „ამომრჩევლის ხელმოწერა“, აკეთებს ჩანაწერს „ფიზიკური მდგომარეობა“ და აღნიშნულს ადასტურებს პირადი ხელმოწერით;
- ▶ ამომრჩეველს უფლება აქვს დასახმარებლად მიიწვიოს ნებისმიერი პირი, გარდა საარჩევნო კომისიის წევრისა, კანდიდატისა, საარჩევნო სუბიექტის წარმომადგენლისა და დამკვირვებლისა;
- ▶ აღნიშნული ამომრჩევლის ნაცვლად, მისი თანდასწრებით, ბიულეტენს სპეციალურ კონვერტში ათავსებს და შემდეგ საარჩევნო ყუთში აგდებს მის მიერ არჩეული პირი რომელიც დაეხმარება მას კენჭისყრის კაბინაში საარჩევნო ბიულეტენის შევსებაში.

კენჭისყრის დღეს წესრიგის დაცვა კენჭისყრის შენობაში

(საარჩევნო კოდექსი - მუხლი 59)

კენჭისყრის დღეს კენჭისყრის შენობაში წესრიგის დაცვაზე პასუხისმგებელია საუბნო საარჩევნო კომისიის თავმჯდომარე. საუბნო საარჩევნო კომისიის თავმჯდომარის მიერ, კენჭისყრის შენობაში წესრიგის დაცვის მიზნით, მიღებულ გადაწყვეტილებათა შესრულება სავალდებულოა საარჩევნო კომისიის წევრებისათვის, კენჭისყრის შენობაში ყოფნის უფლების მქონე ყველა პირისა და ამომრჩევლისათვის.



საუბნო საარჩევნო კომისიას უფლება აქვს, კომისიის მუშაობისთვის ხელის შეშლისა და წესრიგის დარღვევის შემთხვევაში, წესრიგის დამრღვევი გააძევოს კომისიის განთავსების შენობიდან. დამრღვევის გაძევების შემთხვევაში დგება შესაბამისი აქტი, რომელსაც ხელს აწერენ კომისიის თავმჯდომარე და წევრები.

ყურადღება!

- ▶ დაუშვებელია კენჭისყრის შენობაში შეიარაღებულ პირთა შესვლა.
- ▶ თუ კენჭისყრის შენობაში ან მის მიმდებარე ტერიტორიაზე საფრთხე ექმნება კენჭისყრის ჩატარებას ან საარჩევნო დოკუმენტაციის უსაფრთხო გადაადგილებას, საუბნო საარჩევნო კომისიის თავმჯდომარის მოთხოვნით შეიძლება გამოძახებულ იქნენ და დარღვევის აღკვეთამდე კენჭისყრის შენობაში/მიმდებარე ტერიტორიაზე იმყოფებოდნენ პოლიციის მუშაკები.

კენჭისყრაში მონაწილე ამომრჩეველთა აღრიცხვა

(საარჩევნო კოდექსი - მუხლი 65.6)

რეკომენდებულია რეგისტრატორებმა 10:00, 12:00, 15:00, 17:00 და 19:00 საათზე, კენჭისყრის პროცესისთვის ხელისშეუშლელად, გადაითვალონ სიებში ამომრჩეველთა ხელმოწერებისა და მათ მიერ გაცემული ბიულეტენების რაოდენობა (თავმჯდომარისთვის გადაცემული გაფუჭებული ბიულეტენების ჩათვლით).

ყურადღება!

თუ მონაცემებს შორის სხვაობა გამოვლინდა, რეგისტრატორმა დაუყოვნებლივ უნდა დაწეროს ახსნა-განმარტება, რომელიც დაერთდება კენჭისყრის შედეგების შემაჯამებელ ოქმს.

კომისიის მდივანს ამომრჩეველთა სიაში კენჭისყრაში მონაწილე ამომრჩეველთა ხელმოწერების რაოდენობა 12:00 და 17:00 საათის მდგომარეობით შეაქვს საუბნო საარჩევნო კომისიის სადემონსტრაციო ოქმსა და ჩანაწერთა წიგნში და აცნობებს საოლქო საარჩევნო კომისიას.

გადასატანი საარჩევნო ყუთის მეშვეობით ხმის მიცემა

გადასატანი საარჩევნო ყუთის მეშვეობით კენჭისყრის პროცედურა იწყება კენჭისყრის დღის 09:00 საათიდან და სრულდება 19:00 საათზე. კენჭისყრის დამთავრების შემდეგ დაუყოვნებლივ ილუქება საარჩევნო ყუთში სპეციალური კონვერტის ჩასაგდება ჭრილი. გადასატანი საარჩევნო ყუთი საარჩევნო უბანში უნდა დაბრუნდეს არა უგვიანეს 20 საათისა (საარჩევნო კოდექსი - მუხლი 66.1).



კენჭისყრის შენობაში ყოფნის უფლების მქონე პირებს, სურვილისამებრ, უფლება აქვთ დააკვირდნენ გადასატანი საარჩევნო ყუთის მეშვეობით ხმის მიცემის პროცედურას. გადასატანი საარჩევნო ყუთის მეშვეობით ხმის მიცემისას ავტომატურად გამოყენების შემთხვევაში საუბნო საარჩევნო კომისია ვალდებულია გამოყოს ადგილი ავტომატურად კენჭისყრის შენობაში ყოფნის უფლების მქონე პირთაგან წილისყრით გამოვლენილი 2 მეთვალყურისათვის.

საუბნო საარჩევნო კომისიის თავმჯდომარე გადასატანი საარჩევნო ყუთის თანმხლებ კომისიის წევრებს გადასცემს (საარჩევნო კოდექსი - მუხლი 66.3):

- ▶ დალუქულ გადასატან საარჩევნო ყუთს, რომელშიც მოთავსებულია საკონტროლო ფურცელი;
- ▶ გადასატანი საარჩევნო ყუთის სიას;
- ▶ სპეციალურ კონვერტებს;
- ▶ ამომრჩეველთა რეგისტრატორის მიერ ხელმოწერითა და სპეციალური ბეჭდით დამოწმებულ საჭირო რაოდენობის საარჩევნო ბიულეტენებს.

ზემოაღნიშნული მონაცემები კომისიის მდივანს შეაქვს ჩანაწერთა წიგნის მე-4 გვერდზე.

ყურადღება!

მარკირება არ გამოიყენება გადასატანი საარჩევნო ყუთის საშუალებით კენჭისყრაში მონაწილე ამომრჩეველთა მიმართ (საარჩევნო კოდექსი - მუხლი 64.5).

ფიზიკური მდგომარეობის მქონე ამომრჩევლის მიერ გადასატანი საარჩევნო ყუთის მეშვეობით ხმის მიცემის შემთხვევაში, გადასატანი საარჩევნო ყუთის სიის გრაფაში - „ამომრჩევლის

ხელმოწერა” – გადასატანი საარჩევნო ყუთის თანმხლები კომისიის წევრი აკეთებს ჩანაწერს „ფიზიკური მდგომარეობა” და ადასტურებს პირადი ხელმოწერით.


აღნიშნული ამომრჩევლის ნაცვლად ბიულეტენს ავსებს, სპეციალურ კონვერტში ათავსებს და კონვერტს აგდებს გადასატან საარჩევნო ყუთში, ამომრჩევლის თანდასწრებით მის მიერ არჩეული პირი (გარდა: საარჩევნო კომისიის წევრისა, კანდიდატისა, საარჩევნო სუბიექტის წარმომადგენლისა და დამკვირვებლისა) (*საქართველოს ცენტრალური საარჩევნო კომისიის 2012 წლის 21 ივნისის №20/2012 დადგენილება*).

გადასატანი საარჩევნო ყუთის თანმხლებმა კომისიის წევრებმა კენჭისყრის შენობაში დაბრუნების შემდეგ, საუბნო საარჩევნო კომისიის მდივანს უნდა გადასცენ გამოუყენებელი ბიულეტენები და სპეციალური კონვერტები. კომისიის მდივანმა ასეთ ბიულეტენებს და სპეციალურ კონვერტებს უნდა ჩამოაჭრას კუთხე, დააწეროს „გაფუჭებულია“ და კომისიის თავმჯდომარის ხელმოწერის შემდეგ ცალკე შეინახოს.

3.3. საარჩევნო უბნის დახურვა, კენჭისყრის შედეგების შეჯამება

საარჩევნო უბნის დახურვა

კენჭისყრის პროცედურა სრულდება და კენჭისყრის შენობა იკეტება 20:00 საათზე. ამ დროისათვის რიგში მდგომ ამომრჩევლებს შეუძლიათ ხმის მიცემა. საუბნო საარჩევნო კომისიის თავმჯდომარის დავალებით კომისიის ერთ-ერთი წევრი აღრიცხავს რიგში მდგომ ამომრჩეველთა გვარებსა და სახელებს და მათ რაოდენობას აცნობებს საუბნო საარჩევნო კომისიის თავმჯდომარეს, ხოლო კომისიის მდივანი ჩანაწერთა წიგნში აღნიშნავს რიგში მდგომი ამომრჩევლების რაოდენობას. როგორც კი ბოლო ამომრჩეველი მისცემს ხმას, კენჭისყრა დასრულებულად ცხადდება, რის შემდეგაც საუბნო საარჩევნო კომისია ლუქავს საარჩევნო ყუთის ჭრილს (*საარჩევნო კოდექსი - მუხლი 65.8*).



ყურადღება!

- ▶ გამონაკლის შემთხვევაში შექმნილ საუბნო საარჩევნო კომისიას შეუძლია კენჭისყრა დამთავრებულად გამოაცხადოს 20 საათამდე ნებისმიერ დროს, თუ კენჭისყრაში მონაწილეობა მიიღო ამომრჩეველთა სიაში შეყვანილმა ყველა ამომრჩეველმა.
- ▶ კენჭისყრის დასრულების შემდეგ გამონაკლის შემთხვევაში შექმნილი საუბნო საარჩევნო კომისია ლუქავს საარჩევნო ყუთის ჭრილს, ამომრჩეველთა სიას, გამოუყენებელ და გაფუჭებულ საარჩევნო ბიულეტენებს (ბიულეტენებს დალუქვამდე ჩამოეჭრება კუთხე).

საუბნო საარჩევნო კომისიის თავმჯდომარემ უნდა უზრუნველყოს, რომ ყველა პირმა, ხმების დათვლისას კენჭისყრის შენობაში ყოფნის უფლების მქონე პირების გარდა, დატოვოს საარჩევნო უბანი. საუბნო საარჩევნო კომისიის მდივანმა კენჭისყრის დღის ჩანაწერთა წიგნში უნდა მიუთითოს ხმების დათვლის დროს კენჭისყრის შენობაში მყოფ პირთა ვინაობა.

ყურადღება!

კენჭისყრის შენობის დაკეტვის შემდეგ გამონაკლის შემთხვევაში შექმნილი საუბნო საარჩევნო კომისიის წარმომადგენლებს საოლქო საარჩევნო კომისიის მიერ წინასწარ განსაზღვრულ საარჩევნო უბნის შენობაში შეაქვთ გამონაკლის შემთხვევაში შექმნილი საარჩევნო უბნის საარჩევნო ყუთი და დალუქული საარჩევნო დოკუმენტაცია.

საარჩევნო უბნის მოწყობა ხმების დათვლის პროცედურისთვის

კენჭისყრის დასრულების შემდეგ კომისიის თავმჯდომარე მიდის თითოეულ რეგისტრატორთან, რომლებიც კომისიის თავმჯდომარის მითითებით (კენჭისყრის დასრულებამდე რეგისტრატორების მიერ დაწერილ ახსნა-განმარტებებში (ასეთის არსებობის შემთხვევაში) აღნიშნული მონაცემების გათვალისწინებით) ითვლიან:

გაცემული
ბიულეტენების
რაოდენობას



გაფუჭებული
ბიულეტენების
რაოდენობა



ამომრჩეველთა
ხელმოწერების
რაოდენობის

ყურადღება!

- ▶ თუ ტოლობა არ შედგა, რეგისტრატორმა ხელახლა უნდა გადათვალოს და დააზუსტოს რაოდენობა. თუ ტოლობა კვლავ არ შედგა, რეგისტრატორმა უნდა დაწეროს ახსნა-განმარტება (მიზეზის მითითებით), რომელიც თან უნდა დაერთოს შემაჯამებელ ოქმს.
- ▶ რეგისტრატორების ახსნა-განმარტებებში (ასეთის არსებობის შემთხვევაში) მითითებული მონაცემები გათვალისწინებულ უნდა იქნას კენჭისყრის შემაჯამებელი ოქმს შედგენისას.

კენჭისყრის დასრულების შემდეგ საუბნო საარჩევნო კომისიის თავმჯდომარე, კენჭისყრის შენობაში ყოფნის უფლების მქონე პირთა თანდასწრებით, კომისიისა და ამომრჩეველთა რეგისტრატორის ბეჭდებს უკეთებს მეორე ნაკვეთურს. ნაკვეთურიანი ბეჭდების ნიმუში აისახება ჩანაწერთა წიგნში (საარჩევნო კოდექსი - მუხლი 67.1).

კომისიის თავმჯდომარე კენჭისყრის შენობაში ყოფნის უფლების მქონე პირთა თანდასწრებით, კომისიის წევრთაგან წილისყრით შეარჩევს არანაკლებ სამ მთვლელს, ხოლო დამკვირვებლები თავისი შემადგენლობიდან, ურთიერთშეთანხმებით, შეარჩევენ არა უმეტეს ორ მეთვალყურეს. თუ დამკვირვებლები ვერ შეთანხმდებიან, მათგან ორ მეთვალყურეს წილისყრით გამოავლენს კომისიის თავმჯდომარე (საარჩევნო კოდექსი - მუხლი 67.1).

მთვლელების გამოსავლენად წილისყრა შემდეგი წესის დაცვით მიმდინარეობს - საუბნო საარჩევნო კომისიის თავმჯდომარე:

- ▶ აანალიზებს კომისიის რამდენი წევრი მონაწილეობს წილისყრის პროცესში;
- ▶ მათი რაოდენობის შესაბამისად ამზადებს ერთი ფორმისა და სახეობის ფურცლებს;
- ▶ ფურცლებზე, ერთი და იმავე საწერი საშუალებით წერს ფუნქციის



დასახელებას “პირველი მთვლეელი”, “მეორე მთვლეელი”, “მესამე მთვლეელი”;

- ▶ წილისყრის ფურცლებს ამოწმებს კომისიის სპეციალური ბეჭდით;
- ▶ ფურცლებს კეცავს იმგვარად, რომ შეუძლებელი იყოს ტექსტის წაკითხვა და ათავსებს მაგიდაზე.

წილისყრის მონაწილე კომისიის წევრები სათითაოდ იღებენ წილისყრის ფურცლებს. წილისყრის შედეგები კომისიის მდივანს შეაქვს ჩანაწერთა წიგნის მე-3 გვერდზე (საარჩევნო კოდექსი - მუხლი 61.2.ვ).

საარჩევნო უბანზე მყოფი წარმომადგენლებისაგან კომისიის თავმჯდომარე წილისყრით გამოავლენს არა უმეტეს 2 წარმომადგენელს, რომლებიც კომისიის წევრთაგან წილისყრით გამოვლენილ მთვლელებთან ერთად მონაწილეობენ ნამდვილი ან/და ბათილი საარჩევნო ბიულეტენების დათვლის პროცესში (საარჩევნო კოდექსი - მუხლი 67.2).

ყურადღება!

წილისყრაში არ მონაწილეობენ იმ საარჩევნო სუბიექტების წარმომადგენლები, რომელთა მიერ დანიშნული კომისიის წევრები არიან წილისყრით გამოვლენილი მთვლელები (საარჩევნო კოდექსი - მუხლი 67.2).

კომისიის თავმჯდომარე და მთვლელები ხმების დათვლის პროცედურისთვის ამზადებენ საარჩევნო უბანს:

- ▶ მთვლელები იკავებენ ადგილს მაგიდის ერთ მხარეს;
- ▶ კომისიის თავმჯდომარე იკავებს ადგილს ისე, რომ მან შეძლოს ყველა მთვლელის დანახვა;
- ▶ კომისიის მდივანი ადგილს იკავებს თავმჯდომარის გვერდით და ავსებს ჩანაწერთა წიგნს;
- ▶ კენჭისყრის შენობაში ყოფნის უფლების მქონე დანარჩენი პირები ადგილს იკავებენ მაგიდისგან (მთვლელებისაგან) ორი მეტრის დაშორებით (საარჩევნო კოდექსი - მუხლი 68.3).



კომისიის თავმჯდომარემ მთვლელების მაგიდასთან უნდა მიიტანოს:

- ▶ ამომრჩეველთა ერთიანი სია, სპეციალური სია, გადსატანი საარჩევნო ყუთის სია;
- ▶ გამოუყენებელი საარჩევნო ბიულეტენები;
- ▶ გაფუჭებული საარჩევნო ბიულეტენები;
- ▶ ძირითადი და გადსატანი საარჩევნო ყუთები;
- ▶ შესადარებლად შენახული საკონტროლო ფურცელი;
- ▶ სანთლები, ფარანი (ელექტროენერგიის შეწყვეტის შემთხვევისთვის);
- ▶ კალკულატორი.

საარჩევნო ყუთის გახსნამდე ჩასატარებელი პროცედურები

(საარჩევნო კოდექსი - მუხლი 67)

მთვლელები თანამიმდევრულად ითვლიან კენჭისყრაში მონაწილე ამომრჩეველთა საერთო რაოდენობას (საარჩევნო კოდექსი - მუხლი 67.3):

- ▶ ამომრჩეველთა ერთიანი სიის მიხედვით;
- ▶ სპეციალური სიის მიხედვით;
- ▶ გადსატანი საარჩევნო ყუთის სიის მიხედვით.

საუბნო საარჩევნო კომისიის მდივანს შედეგები დაუყოვნებლივ შეაქვს სადემონსტრაციო ოქმსა და ჩანაწერთა წიგნში.

საუბნო საარჩევნო კომისიის მდივანი გამოუყენებელ საარჩევნო ბიულეტენებს ჩამოაჭრის კუთხეს. გამოუყენებელ და გაფუჭებულ საარჩევნო ბიულეტენებს კრავს ცალ-ცალკე პაკეტებად. (საარჩევნო კოდექსი - მუხლი 67.4).

ამომრჩეველთა სიების, გაფუჭებული და გამოუყენებელი საარჩევნო ბიულეტენების დალუქვა

(საარჩევნო კოდექსი - მუხლი 67.3; 67.4):

კომისიის მდივანი ცალ-ცალკე ლუქავს:

- ▶ ამომრჩეველთა ერთიან სიას;
- ▶ სპეციალურ სიას;
- ▶ გადასატანი საარჩევნო ყუთის სიას;

მთვლელები ცალ-ცალკე ლუქავენ:

- ▶ გამოუყენებელ საარჩევნო ბიულეტენებს;
- ▶ გაფუჭებულ საარჩევნო ბიულეტენებს;

მთვლელები თითოეულ პაკეტზე მიუთითებენ საარჩევნო უბნის დასახელებას და ნომერს, საარჩევნო დოკუმენტაციის სახეს. კონვერტს ხელს აწერენ მთვლელები და კომისიის თავმჯდომარე.



გადასატანი საარჩევნო ყუთის გახსნა

(საარჩევნო კოდექსი - მუხლი 68.1,2,4)

კომისია თავდაპირველად ხსნის გადასატან საარჩევნო ყუთს.

კომისიის თავმჯდომარე, კომისიის წევრებისა და კენჭისყრის შენობაში ყოფნის უფლების მქონე პირთა თანდასწრებით, ამოწმებს საარჩევნო ყუთზე ლუქის მთლიანობას.



ყურადღება!

თუ ლუქის მთლიანობა დარღვეული აღმოჩნდა, მაგრამ კომისია მიიჩნევს, რომ ამას არ გამოუწვევია კანონის მოთხოვნათა დარღვევა, კომისიის განკარგულებით გრძელდება კენჭისყრის შედეგების შეჯამების პროცედურა. წინააღმდეგ შემთხვევაში საარჩევნო ყუთი ილუქება და საუბნო საარჩევნო კომისიის განკარგულებასთან ერთად დაუყოვნებლივ გადაეცემა ზემდგომ საოლქო საარჩევნო კომისიას.

მთვლელები გადასატან საარჩევნო ყუთში არსებულ სპეციალურ კონვერტებს ათავსებენ მაგიდაზე, რის შემდეგაც:

- ▶ ამოწმებენ გადასატან საარჩევნო ყუთში საკონტროლო ფურცლის არსებობას;
- ▶ ყუთში არსებულ საკონტროლო ფურცელს უდარებენ კომისიაში შედარების მიზნით შენახულ საკონტროლო ფურცელს;
- ▶ თუ დარღვევა არ გამოვლინდა, კომისიის თავმჯდომარე მიუთითებს მთვლელებს დროებით დააბრუნონ სპეციალური კონვერტები გადასატან ყუთში.



ყურადღება!

თუ გადასატან საარჩევნო ყუთში არ აღმოჩნდა საკონტროლო ფურცელი, ან საკონტროლო ფურცლებს შორის განსხვავება გამოვლინდა, ყველა სპეციალური კონვერტი და საარჩევნო ბიულეტენი შეიკვრება პაკეტად, დაეწერება „ბათილია“. დოკუმენტაცია საარჩევნო უბანში კენჭისყრისა და ხმის დათვლის პროცედურების დასრულების შემდეგ გადაეცემა საოლქო საარჩევნო კომისიას.

ძირითადი საარჩევნო ყუთის გახსნა

(საარჩევნო კოდექსი - მუხლი 68.1,2,5)

კომისიის თავმჯდომარე, კომისიის წევრებისა და კენჭისყრის შენობაში ყოფნის უფლების მქონე პირთა თანდასწრებით, ამოწმებს საარჩევნო ყუთზე ლუქის მთლიანობას.

ყურადღება!

თუ ლუქის მთლიანობა დარღვეული აღმოჩნდა, მაგრამ კომისია მიიჩნევს, რომ ამას არ გამოუწვევია კანონის მოთხოვნათა დარღვევა, კომისიის განკარგულებით გრძელდება კენჭისყრის შედეგების შეჯამების პროცედურა. წინააღმდეგ შემთხვევაში საარჩევნო ყუთი ილუქება და საუბნო საარჩევნო კომისიის განკარგულებასთან ერთად დაუყოვნებლივ გადაეცემა საოლქო საარჩევნო კომისიას.

მთვლელები:

- ▶ ძირითად საარჩევნო ყუთში არსებულ სპეციალურ კონვერტებსა და საარჩევნო ბიულეტენებს ათავსებენ მაგიდაზე;
- ▶ ამოწმებენ ძირითად საარჩევნო ყუთში საკონტროლო ფურცლის არსებობას და მას უდარებენ კომისიაში შედარების მიზნით შენახულ საკონტროლო ფურცელს.

ყურადღება!

თუ საკონტროლო ფურცლებს შორის განსხვავება გამოვლინდა ან ძირითად საარჩევნო ყუთში საკონტროლო ფურცელი არ აღმოჩნდა, ყველა სპეციალური კონვერტი და საარჩევნო ბიულეტენი შეიფუთება, დაილუქება, შედგება სათანადო ოქმი და დაუყოვნებლივ გადაეცემა საოლქო საარჩევნო კომისიას.

გამონაკლის შემთხვევაში შექმნილი საარჩევნო უბნის საარჩევნო ყუთის გახსნა

(საარჩევნო კოდექსი - მუხლი 67.7-8)

გამონაკლის შემთხვევაში შექმნილი საარჩევნო უბნის საარჩევნო ყუთი (ასეთის არსებობის შემთხვევაში) იხსნება მას შემდეგ, რაც გაიხსნება ძირითადი საარჩევნო უბნის გადასატანი და ძირითადი საარჩევნო ყუთები.

თუ საარჩევნო ყუთის (ყუთების) გახსნისას ხარვეზი არ გამოვლინდება, მთვლელები ერთმანეთში ურევნ ძირითადი, გადასატანი და გამონაკლის შემთხვევაში შექმნილ საარჩევნო უბნის (ასეთის არსებობის შემთხვევაში) საარჩევნო ყუთებიდან გადმოყრილ სპეციალურ კონვერტებს და იწყებენ საარჩევნო ბიულეტენების დათვლას.

ხმის დათვლის პროცედურა

მთვლელები იკავებენ ადგილს მაგიდის ერთ მხარეს, მათ გვერდით დგება დამკვირვებელთაგან გამოვლენილი ორი მეთვალყურე და წილისყრით გამოვლენილი საარჩევნო სუბიექტების ორი წარმომადგენელი.

საარჩევნო ბიულეტენების დახარისხება

(საარჩევნო კოდექსი - მუხლი 69)

პირველი მთვლეელი:

- ▶ სპეციალური კონვერტიდან იღებს საარჩევნო ბიულეტენს;
- ▶ აცხადებს, ვისთვისაა მიცემული ხმა;
- ▶ ერთი სახის საარჩევნო ბიულეტენს გადასცემს მთვლელებს;
- ▶ სპეციალურ კონვერტს დებს ცალკე.

მთვლელები ცალ-ცალკე აწყოზენ:

- ▶ თითოეული საარჩევნო სუბიექტისათვის მიცემულ ხმებს;
- ▶ ბათილად მიჩნეულ ბიულეტენებს;
- ▶ საეჭვოდ მიჩნეულ ბიულეტენებს.

დადგენილი ნიმუშის საარჩევნო ბიულეტენი მხოლოდ იმ შემთხვევაში მიიჩნევა ბათილად, თუ:

- ▶ სპეციალური კონვერტი არ არის დადგენილი ნიმუშის;
- ▶ სპეციალურ კონვერტში აღმოჩნდა ერთზე მეტი საარჩევნო ბიულეტენი;
- ▶ საარჩევნო ბიულეტენი საარჩევნო ყუთში აღმოჩნდა სპეციალური კონვერტის გარეშე;
- ▶ საარჩევნო ბიულეტენი დამოწმებული არ არის ამომრჩეველთა რეგისტრატორის ხელმოწერითა და სპეციალური ბეჭდით;
- ▶ შეუძლებელია იმის დადგენა, რომელ საარჩევნო სუბიექტს მისცა ხმა ამომრჩეველმა;
- ▶ საარჩევნო ბიულეტენი განკუთვნილი იყო სხვა საარჩევნო უბნისთვის (ასეთი ბიულეტენები ცალკე პაკეტად იკვრება და მათი რაოდენობა აღინიშნება მხოლოდ ჩანაწერთა წიგნში). აღნიშნული მონაცემები შემაჯამებელ ოქმში არ შეიტანება.

საარჩევნო ბიულეტენების დახარისხების დასრულების შემდეგ, კომისია განიხილავს და კენჭისყრით წყვეტს საეჭვოდ მიჩნეული ბიულეტენების ნამდვილობის საკითხს.

ნამდვილად მიჩნეულ საარჩევნო ბიულეტენს კომისიის თავმჯდომარე დებს ნამდვილი ბიულეტენების დასტაში (საარჩევნო სუბიექტისათვის მიცემული ხმის მიხედვით), ხოლო ბათილად მიჩნეულ საარჩევნო ბიულეტენს - ბათილად მიჩნეული საარჩევნო ბიულეტენების დასტაში.



საარჩევნო ბიულეტენების დათვლა

ბიულეტენების დახარისხების შემდეგ კომისიის თავმჯდომარე მთვლელებს მიუთითებს დაითვალონ:

- ▶ ბათილად მიჩნეული ბიულეტენები;
- ▶ თითოეული საარჩევნო სუბიექტისათვის მიცემული ხმები.

ყურადღება!

საარჩევნო სუბიექტისთვის კუთვნილი ყოველი 10 საარჩევნო ბიულეტენი იკვრება ლითონის შემკერით და ყოველ შეკვრას, როგორც სრულს, ისე არასრულს, ზემოდან ეწერება შეკრული საარჩევნო ბიულეტენების რაოდენობა. ეს შეკვრები, თავის მხრივ, იკვრება დასტად.



კომისიის თავმჯდომარე აცხადებს თითოეული საარჩევნო სუბიექტის მიერ მიღებული ხმების რაოდენობას. კომისიის მდივანი თავმჯდომარესთან ერთად, მონაცემების სისწორის გადამოწმების მიზნით ამოწმებს:



თუ სუბიექტების მიერ მიღებული ხმებისა და ბათილი ბიულეტენების **ჯამი მეტია** ამომრჩეველთა ხელმოწერების რაოდენობაზე, კომისიის თავმჯდომარე მთვლელებს მიუთითებს ხელახლა გადაითვალონ მონაცემები, რის შემდეგ შედეგები კომისიის მდივანს შეაქვს ჩანაწერთა წიგნში და სადემონსტრაციო ოქმში.

საარჩევნო ბიულეტენების დალუქვა

(საარჩევნო კოდექსი - მუხლი 69.6,9)

საარჩევნო ბიულეტენების დათვლის შემდეგ კომისიის თავმჯდომარე მთვლელებს მიუთითებს ცალ-ცალკე კონვერტში დალუქონ:

- ▶ ბათილი ბიულეტენები (მათ ეწერება „ბათილია“);
- ▶ საარჩევნო სუბიექტის კუთვნილი საარჩევნო ბიულეტენების დასტა.



ყურადღება!

საარჩევნო სუბიექტის კუთვნილი საარჩევნო ბიულეტენების დასტას უნდა დაეწეროს საარჩევნო უბნის დასახელება და ნომერი, საარჩევნო სუბიექტის მონაცემები (დასახელება, სახელი და გვარი) და მის მიერ მიღებული ხმების რაოდენობა, აგრეთვე ამ დასტაში ჩადებული საარჩევნო ბიულეტენების რაოდენობა.

თითოეულ კონვერტს მთვლელები აწერენ ოლქისა და უბნის ნომერს, საარჩევნო ბიულეტენების სახეობასა და რაოდენობას. კონვერტს დალუქვის ზოლზე ხელს აწერენ მთვლელები და კომისიის თავმჯდომარე.



კენჭისყრის შედეგების შემაჯამებელი ოქმის შედგენა

(საარჩევნო კოდექსი - მუხლი 71)

კომისიის მდივანი თავმჯდომარესთან შეთანხმებით ავსებს კენჭისყრის შედეგების შემაჯამებელ ოქმს და რეგისტრაციაში ატარებს სარეგისტრაციო ჟურნალში.

ყურადღება!

- ▶ რეგისტრატორების ახსნა-განმარტებებში (ასეთის არსებობის შემთხვევაში) მითითებული მონაცემები გათვალისწინებულ უნდა იქნას კენჭისყრის შემაჯამებელი ოქმის შედგენისას.
- ▶ კომისიის ყველა წევრი ვალდებულია, ხელი მოაწეროს კენჭისყრის შედეგების შემაჯამებელ ოქმს.
- ▶ თუ კომისიის წევრი არ ეთანხმება შემაჯამებელ ოქმებში შეტანილ მონაცემებს, მას უფლება აქვს ოქმს წერილობით დაურთოს განსხვავებული აზრი, მაგრამ ვალდებულია ოქმს მოაწეროს ხელი.
- ▶ აკრძალულია შემაჯამებელ ოქმში შეტანილი მონაცემების გადასწორება.
- ▶ შეცდომის გამოსასწორებლად შემაჯამებელ ოქმში შესაბამისი მონაცემის გასწორივ კეთდება წარწერა „შესწორებულია“ და დგება შესწორების ოქმი.

შემაჯამებელი ოქმის საჯაროობა

(საარჩევნო კოდექსი - მუხლი 71.8)

საარჩევნო კომისია ვალდებულია კენჭისყრის შედეგების შემაჯამებელი ოქმის ასლი გამოაკრას საჯარო გაცნობისათვის.



კომისია ოქმის ასლს, კომისიის წევრთა თანდართული განსხვავებული აზრებით (ასეთის არსებობისას), მოთხოვნის შემთხვევაში დაუყოვნებლივ გადასცემს **საარჩევნო სუბიექტის წარმომადგენლებს** ან პარტიის მიერ დანიშნულ საუბნო საარჩევნო კომისიის წევრს და დამკვირვებელი ორგანიზაციის



დამკვირვებლებს.

ოქმის ასლი უნდა დამოწმდეს კომისიის ბეჭდით და კომისიის თავმჯდომარისა და მდივნის ხელმოწერებით. ოქმის ასლის მიღებას მიმღები პირი ადასტურებს ჩანაწერთა წიგნში ხელმოწერით.

კომისია ვალდებულია კენჭისყრის შედეგების შემაჯამებელი ოქმი, შესწორების ოქმსა და რეგისტრატორების წერილობით ახსნა-განმარტებებთან ერთად (ასეთის არსებობის შემთხვევაში) დაუყოვნებლივ გადაუგზავნოს ცესკოს.

სარეგისტრაციო ჟურნალის, ჩანაწერთა წიგნის დალუქვა, საარჩევნო დოკუმენტაციის გადაცემა საოლქო საარჩევნო კომისიისთვის

ყველა პროცედურის დასრულების შემდეგ იხურება კომისიის სარეგისტრაციო ჟურნალი და ჩანაწერთა წიგნი, მას ხელს აწერენ კომისიის თავმჯდომარე და მდივანი და იგი მოწმდება კომისიის ბეჭდით.

კომისია ლუქავს:

- ▶ ჩანაწერთა წიგნს, სარეგისტრაციო ჟურნალსა და განცხადება/საჩივრებს;

ყურადღება!

შემაჯამებელი ოქმი არ ილუქება.

- ▶ საუბნო საარჩევნო კომისიის სპეციალურ ბეჭედს (კომისიის ბეჭდის დალუქულ პაკეტს ხელს აწერს კომისიის ყველა წევრი).



კომისიის უფლებამოსილი პირები საოლქო საარჩევნო კომისიას გადასცემენ ინვენტარსა და საარჩევნო დოკუმენტაციის ყუთს/ტომარას, რომელშიც მოთავსებულია დალუქული საარჩევნო დოკუმენტაცია. ამასთან დაკავშირებით დგება მიღება-ჩაბარების აქტი. მიღება-ჩაბარების აქტს ხელს აწერენ საარჩევნო დოკუმენტაციის გამცემი და მიმღები პირები, რის შემდეგაც თითოეულს გადაეცემა აქტის თითო ეგზემპლარი.

თავი 4

კენჭისყრის დღის შემდგომი პერიოდი



ძირითადი აქტივობები

- | | |
|------|---|
| 4.1. | საოლქო საარჩევნო კომისიის მიერ კენჭისყრისა და არჩევნების შედეგების შეჯამება |
| 4.2. | ცესკოს მიერ არჩევნების შედეგების შეჯამება |

4.1. საოლქო საარჩევნო კომისიის მიერ კენჭისყრისა და არჩევნების შედეგების შეჯამება

საუბნო საარჩევნო კომისიების შემაჯამებელი ოქმების საფუძველზე, საარჩევნო კანონმდებლობის დარღვევის განხილვის შედეგების გათვალისწინებით, კენჭისყრიდან არა უგვიანეს მე-11 დღის (8 მაისი) საოლქო საარჩევნო კომისია აჯამებს საქართველოს პარლამენტის არჩევნების კენჭისყრის შედეგებს და ადგენს შემაჯამებელ ოქმს.

საოლქო საარჩევნო კომისიის ყველა წევრი, რომელიც ესწრება კომისიის სხდომას, ვალდებულია ხელი მოაწეროს არჩევნების შედეგების შემაჯამებელ ოქმს. ოქმი მოწმდება საოლქო საარჩევნო კომისიის ბეჭდით.

თუ საოლქო საარჩევნო კომისიის წევრი არ ეთანხმება შემაჯამებელ ოქმში შეტანილ მონაცემებს, მას უფლება აქვს, ოქმში აღნიშნოს, რას არ ეთანხმება და ოქმს წერილობით დაურთოს განსხვავებული აზრი.

საოლქო საარჩევნო კომისიის შემაჯამებელი ოქმის ასლი (საოლქო საარჩევნო კომისიის წევრთა თანდართული განსხვავებული აზრებით) მისი მოთხოვნის შემთხვევაში დაუყოვნებლივ გადაეცემა პარტიის/საარჩევნო სუბიექტის/საინიციატივო ჯგუფის წარმომადგენლებს და დამკვირვებელი ორგანიზაციის დამკვირვებლებს. ოქმის ასლი უნდა დამოწმდეს საოლქო საარჩევნო კომისიის ბეჭდით და საოლქო საარჩევნო კომისიის თავმჯდომარისა და საოლქო საარჩევნო კომისიის მდივნის ხელმოწერებით (ამ ოქმის იურიდიული ძალა ისეთივეა, როგორც საოლქო საარჩევნო კომისიის შემაჯამებელი ოქმისა). ოქმის მიღებას **საარჩევნო სუბიექტის წარმომადგენელი** ხელმოწერით ადასტურებს საოლქო საარჩევნო კომისიის სარეგისტრაციო ჟურნალში.

4.2. ცესკოს მიერ არჩევნების შედეგების შეჯამება

ცესკო საოლქო და საუბნო საარჩევნო კომისიებისგან მიღებული ოქმებისა და სასამართლოს საბოლოო გადაწყვეტილებების საფუძველზე, არჩევნების დღიდან არა უგვიანეს მე-19 დღისა (16 მაისი), თავის სხდომებზე აჯამებს საქართველოს პარლამენტის შუალედური არჩევნების შედეგებს და ადგენს ოქმს.

ყურადღება!

ცესკო საარჩევნო უბნებიდან კენჭისყრის შედეგების შემაჯამებელი ოქმების შემოსვლის პარალელურად უზრუნველყოფს ამ ოქმების მონაცემთა ცესკოს ვებ-გვერდზე განთავსებას.

არჩევნების შედეგების შემაჯამებელ ოქმს ხელს აწერენ ცესკოს თავმჯდომარე და ცესკოს მდივანი. ოქმის ერთი ეგზემპლარი ინახება ცესკოში. ოქმის ასლები გადაეცემა ყველა დაინტერესებულ პირს.

არჩევნების საბოლოო შედეგების შეჯამებისთანავე ცესკო თავის ვებ-გვერდზე აქვეყნებს ცნობას არჩევნების შედეგების შესახებ თითოეული საარჩევნო უბნის მიხედვით და არა უგვიანეს მომდევნო დღისა გადასცემს მას პრესისა და მასობრივი ინფორმაციის სხვა საშუალებებს.

თავი 5

საარჩევნო კომისიებში განცხადება/საჩივრის შეტანისა და განხილვის წესი

5.1. საუბნო საარჩევნო კომისიაში განცხადება/საჩივრის შეტანისა და განხილვის წესი

განცხადება/საჩივრები

საარჩევნო უბნის გახსნიდან საარჩევნო ყუთის გახსნამდე

განცხადება/საჩივრის შემდგენი პირები და მათი უფლებები

საუბნო ან ზემდგომ საარჩევნო კომისიაში:

- ▶ პარტიის/საარჩევნო ბლოკის წარმომადგენელს
- ▶ ამომრჩეველთა საინიციატივო ჯგუფის წარმომადგენელს
- ▶ არჩევნების დამკვირვებლის სტატუსის მქონე ორგანიზაციის დამკვირვებლებს

უფლება აქვთ:

საარჩევნო უბნის გახსნიდან **(7 საათიდან)** საარჩევნო ყუთის გახსნამდე, საუბნო საარჩევნო კომისიისა და მის ცალკეულ წევრთა მოქმედებებისა და გადაწყვეტილებების (გარდა კენჭისყრის შედეგების შემაჯამებელი ოქმის შედგენის) გამო, საუბნო საარჩევნო კომისიაში:

- ▶ გაასაჩივრონ კენჭისყრის დღის პროცედურების დარღვევები, რისთვისაც დარღვევის აღმოჩენისთანავე უნდა შეადგინონ განცხადება/საჩივარი **(იხ. დანართი №1)** საარჩევნო კოდექსით დადგენილი მოთხოვნების დაცვით **(იხ. დანართი №2)**;
- ▶ საჩივრის შედგენისთანავე, ჩააბარონ განცხადება/საჩივარი საუბნო საარჩევნო კომისიის მდივანს, თავმჯდომარეს ან თავმჯდომარის მოადგილეს.

ყურადღება!

დანართი №1-ში მოცემული განცხადების/საჩივრის ფორმა სარეგისტრაციო ხასიათისაა და მისი წარდგენა შეიძლება სხვა ფორმითაც, დანართი №2-ით განსაზღვრული რეკვიზიტების გათვალისწინებით.

საუბნო საარჩევნო კომისიაში განცხადება/საჩივრის რეგისტრაცია

საუბნო საარჩევნო კომისიაში შეტანილ განცხადება/საჩივარს რეგისტრაციაში ატარებს კომისიის მდივანი, შემდეგი წესის მიხედვით:

- ▶ სარეგისტრაციო ჟურნალში მიუთითებს განმცხადებლის ვინაობას;
- ▶ განცხადება/საჩივრის წარმდგენი და მიმღები პირები ხელს აწერენ ჩანაწერის გასწვრივ;
- ▶ ჩანაწერთა წიგნში მე-10 გვერდიდან რეგისტრაციაში ატარებს განცხადება/საჩივარს;
- ▶ განცხადება/საჩივრის მიღების დადასტურების მიზნით, განმცხადებელს გადასცემს წერილობით ცნობას საკუთარი ხელმოწერით და ბეჭდით.

თუ შესაბამისი თანამდებობის პირი არ იბარებს განცხადება/საჩივარს ან/და წარმომადგენლის მიერ დაფიქსირებული დარღვევის აღმოფხვრა არ მოხდა კომისიის მიერ, განმცხადებელს უფლება აქვს დაუკავშირდეს ცხელ ხაზს ნომერზე: 032-251 00 51/ ext ოლქის ნომერი.

განცხადება/საჩივრებზე ხარვეზის დადგენა

საუბნო საარჩევნო კომისიის მდივანი, თავმჯდომარე ან თავმჯდომარის მოადგილე ვალდებულია, განცხადების/საჩივრის წარმდგენს დაუდგინოს ხარვეზი და განუსაზღვროს გონივრული ვადა მის გამოსასწორებლად, თუ განცხადება/საჩივარი არ შეიცავს:

- ▶ განცხადების/საჩივრის შედგენის თარიღსა და დროს;
- ▶ განმცხადებლის/მომჩივნის სახელს, გვარს და რეგისტრაციის ადგილს;
- ▶ საარჩევნო უბნის ნომერს;
- ▶ მოწმის არსებობის შემთხვევაში – მის სახელს, გვარს და რეგისტრაციის ადგილს.

ხარვეზის გამოსასწორებლად მიცემული ვადა უნდა იყოს გონივრული, რომ შეძლონ მითითებული ხარვეზის გამოსწორება.

შენიშვნა: ხარვეზის შევსების გონივრული ვადა დგინდება საუბნო საარჩევნო კომისიის მდივნის, თავმჯდომარის ან მოადგილისა და განცხადება/საჩივრის წარმდგენი პირის შეთანხმების საფუძველზე. ხარვეზის შევსების ვადის თაობაზე მხარეთა შეუთანხმებლობის შემთხვევაში, ვადას ერთპიროვნულად ადგენს საუბნო საარჩევნო კომისიის მდივანი.

სარეგისტრაციო ჟურნალში ხარვეზის ჩანაწერის გასწვრივ ხელს აწერენ განცხადების/საჩივრის წარმდგენი და მიმღები პირები.

ხარვეზის შევსების პროცედურები

განცხადება/საჩივრის წარმდგენს დადგენილ ვადაში უფლება აქვს გამოასწოროს ხარვეზი ანალოგიური განცხადება/საჩივრის წარდგენის გზით, რომელშიც აღმოფხვრილი იქნება ხარვეზის დადგენის საფუძველები ან/და წარადგინოს განცხადება, სადაც მიეთითება ის მონაცემები, რომელთა გამოც დაუდგინდა ხარვეზი.

ხარვეზის შევსების შემთხვევაში განცხადება/საჩივრის მიმღები პირი სარეგისტრაციო ჟურნალში რეგისტრირებული განცხადების/საჩივრის გასწვრივ აკეთებს ჩანაწერს **”შევსებულია”**, ხარვეზის

შევსების ზუსტი დროისა და თარიღის მითითებით. ჩანაწერის გასწორვ ხელს აწერს განცხადება/საჩივრის წარმდგენი და მიმღები პირები.

შენიშვნა: დადგენილ ვადაში ხარვეზის გამოუსწორებლობის შემთხვევაში განცხადება/საჩივარი არ განიხილება, რის თაობაზედაც საუბრო საარჩევნო კომისია გამოსცემს განკარგულებას (განკარგულების სათაურში უნდა მიეთითოს განუხილველად დატოვების კონკრეტული მიზეზი).

რეაგირება განცხადება/საჩივარზე

საუბნო საარჩევნო კომისიის თავმჯდომარე ვალდებულია დაუყოვნებლივ მოახდინოს სათანადო რეაგირება განცხადება/საჩივარზე და აღმოფხვრას არსებული დარღვევა.

კომისიის თავმჯდომარე ან მდივანი ვალდებულია სარეგისტრაციო ჟურნალში და ჩანაწერთა წიგნში მოცემული საჩივრის გასწორვ მიუთითოს, თუ როგორ აღმოიფხვრა/მოგვარდა/გადაწყდა აღნიშნული პრობლემა, ასევე, თუ რა შემთხვევაში ეთქვა უარი დაკმაყოფილებაზე, ან რა შემთხვევაში არ იქნა განხილული საჩივარი.

იმ შემთხვევაში, თუ განცხადება/საჩივარში მითითებულ დარღვევას აღმოფხვრის საუბნო საარჩევნო კომისიის შესაბამისი თანამდებობის პირი (მდივანი, თავმჯდომარე, თავმჯდომარის მოადგილე), აღნიშნულის თაობაზე კეთდება სათანადო ჩანაწერი “დარღვევა აღმოფხვრილია” და ზუსტი დროის მითითებით შეიტანება ჩანაწერთა წიგნში.

თუ კომისიის თავმჯდომარემ არ ან ვერ აღმოფხვრა დარღვევა ან სხვაგვარი ფორმით უარი განაცხადა განცხადება/საჩივარზე რეაგირებაზე, განმცხადებელს/მომჩივანს უფლება აქვს იმავე დარღვევაზე განცხადება/საჩივარი დაუყოვნებლივ წარუდგინოს საოლქო საარჩევნო კომისიას.

წარდგენილი განცხადება/საჩივარი არ განიხილება და საუბნო საარჩევნო კომისია გამოსცემს განკარგულებას განცხადება/საჩივრის განუხილველად დატოვების შესახებ, თუ:

- ▶ განცხადება/საჩივარი შედგენილია არაუფლებამოსილი პირის მიერ;
- ▶ განცხადება/საჩივარში არ არის აღნიშნული დარღვევის არსი და მისი ჩადენის დრო;
- ▶ განცხადება/საჩივარი საარჩევნო კომისიას გადაეცა კანონით მოთხოვნილი ვადების დარღვევით.

განკარგულების სათაურში უნდა მიეთითოს განცხადება/საჩივრის განუხილველად დატოვების კონკრეტული მიზეზი.

განცხადება/საჩივრები

საარჩევნო ყუთის გახსნიდან შემაჯამებელი ოქმის შედგენამდე

განცხადება/საჩივრის შემდგენი პირები და მათი უფლებები

საუბნო ან ზემდგომ საარჩევნო კომისიაში:

- ▶ პარტიის/საარჩევნო ბლოკის წარმომადგენელს
- ▶ ამომრჩეველთა საინიციატივო ჯგუფის წარმომადგენელს
- ▶ არჩევნების დამკვირვებლის სტატუსის მქონე ორგანიზაციის დამკვირვებლებს

უფლება აქვთ:

საარჩევნო ყუთის გახსნიდან კენჭისყრის შედეგების შემაჯამებელი ოქმის შედგენამდე (გარდა

კენჭისყრის შედეგების შემაჯამებელი ოქმის შედგენისა), საუბნო ან ზემდგომ საოლქო საარჩევნო კომისიაში გაასაჩივრონ ხმის დათვლისა და კენჭისყრის შედეგების შეჯამების პროცედურების დროს ჩადენილი დარღვევები და მოითხოვონ კენჭისყრის შედეგების გადასინჯვა ან ბათილად ცნობა.

თუ შესაბამისი თანამდებობის პირი არ იბარებს განცხადება/საჩივარს ან/და წარმომადგენლის მიერ დაფიქსირებული დარღვევის აღმოფხვრა არ მოხდა კომისიის მიერ, განმცხადებელს უფლება აქვს დაუკავშირდეს ცხელ ხაზს ნომერზე: 032-251 00 51/ ext ოლქის ნომერი.

განცხადება/საჩივრების რეგისტრაცია და ხარვეზის დადგენა/შეცემა ხორციელდება ზემოთ აღნიშნული წესით.

წარდგენილ განცხადება/საჩივარს საუბნო საარჩევნო კომისია გადასცემს ზემდგომ საოლქო საარჩევნო კომისიას კენჭისყრის დღიდან **3 კალენდარული დღის** განმავლობაში.

განცხადება/საჩივარი იმავე ვადაში საოლქო საარჩევნო კომისიას შეიძლება გადასცეს უშუალოდ განმცხადებელმა/მომჩივანმა.

განცხადება/საჩივარს საოლქო საარჩევნო კომისიაში მიღებისთანავე საოლქო საარჩევნო კომისიის მდივანი რეგისტრაციაში გაატარებს საოლქო საარჩევნო კომისიის სარეგისტრაციო ჟურნალში და განმცხადებელს გადასცემს წერილობით ცნობას საკუთარი ხელმოწერით.

განცხადება/საჩივრის განხილვა

საოლქო საარჩევნო კომისია განცხადება/საჩივარს განიხილავს და გადაწყვეტილებას იღებს საოლქო საარჩევნო კომისიაში განცხადების/საჩივრის რეგისტრაციიდან **1 კალენდარული დღის** ვადაში. საოლქო საარჩევნო კომისია გადაწყვეტილებას იღებს განკარგულებით, რომელიც შეიძლება გასაჩივრდეს **მხოლოდ სასამართლოში** საარჩევნო კოდექსით დადგენილი წესით.

წარდგენილი განცხადება/საჩივარი არ განიხილება და საოლქო საარჩევნო კომისია გამოსცემს განკარგულებას განცხადება/საჩივრის განუხილველად დატოვების შესახებ, თუ:

- ▶ განცხადება/საჩივარი შედგენილია არაუფლებამოსილი პირის მიერ;
- ▶ განცხადება/საჩივარში არ არის აღნიშნული დარღვევის არსი და მისი ჩადენის დრო;
- ▶ განცხადება/საჩივარი საარჩევნო კომისიას გადაეცა კანონით მოთხოვნილი ვადების დარღვევით.

განკარგულების სათაურში უნდა მიეთითოს განცხადება/საჩივრის განუხილველად დატოვების კონკრეტული მიზეზი.

განცხადება/საჩივრები

საუბნო საარჩევნო კომისიის კენჭისყრის შედეგების შემაჯამებელი ოქმის გასაჩივრება

განცხადება/საჩივრის შემდგენი პირები და მათი უფლებები

- ▶ საარჩევნო რეგისტრაციის მქონე პარტიის წარმომადგენელს
- ▶ საარჩევნო ბლოკის წარმომადგენელს
- ▶ ამომრჩეველთა საინიციატივო ჯგუფის წარმომადგენელს შესაბამის საოლქო საარჩევნო კომისიაში
- ▶ არჩევნების დამკვირვებლის სტატუსის მქონე ორგანიზაციას

უფლება აქვთ:

ზემდგომ საოლქო საარჩევნო კომისიაში, ოქმის შედგენიდან 3 კალენდარული დღის ვადაში, გაასაჩივრონ შემაჯამებელი ოქმი, თუ დადგინდება, რომ საუბნო საარჩევნო კომისიის კენჭისყრის შედეგების შემაჯამებელი ოქმი შედგენილია საარჩევნო კანონმდებლობის მოთხოვნათა დარღვევით.

შენიშვნა: თუ განცხადება/საჩივარი წარდგენილია გასაჩივრების ვადების დარღვევით ან/და საარჩევნო კოდექსით განსაზღვრული არაუფლებამოსილი პირის მიერ, საოლქო საარჩევნო კომისია იღებს განკარგულებას განცხადება/საჩივრის განუხილველად დატოვების თაობაზე. განკარგულების სათაურში უნდა მითითოს განუხილველად დატოვების კონკრეტული მიზეზი.

5.2. საოლქო საარჩევნო კომისიაში განცხადება/საჩივრის შეტანისა და განხილვის წესი

განცხადება/საჩივრები

კენჭისყრისა და ხმის დათვლის პროცედურების დარღვევებზე

განცხადება/საჩივრის შემდგენი პირები და მათი უფლებები

- ▶ პარტიის/საარჩევნო ბლოკის წარმომადგენელს
- ▶ ამომრჩეველთა საინიციატივო ჯგუფის წარმომადგენელს
- ▶ არჩევნების დამკვირვებლის სტატუსის მქონე ორგანიზაციის დამკვირვებლებს

უფლება აქვთ:

კენჭისყრის, ხმის დათვლის და კენჭისყრის შედეგების შეჯამების პროცედურების დროს ჩადენილი დარღვევების შესახებ განცხადება/საჩივრით მიმართონ ზემდგომ საოლქო საარჩევნო კომისიას საქართველოს ორგანული კანონის „საქართველოს საარჩევნო კოდექსი“ დადგენილი წესით:

- ▶ საარჩევნო უბნის გახსნიდან **(7 საათიდან)** საარჩევნო ყუთის გახსნამდე, გაასაჩივრონ კენჭისყრის დღის პროცედურების დარღვევები, რისთვისაც დარღვევის აღმოჩენისთანავე უნდა შეადგინონ განცხადება/საჩივარი **(იხ. დანართი №1)** საარჩევნო კოდექსით დადგენილი მოთხოვნების დაცვით **(იხ. დანართი №2)**;

ყურადღება!

დანართი №1-ში მოცემული განცხადების/საჩივრის ფორმა სარეკომენდაციო ხასიათისაა და მისი წარდგენა შეიძლება სხვა ფორმითაც, დანართი №2-ით განსაზღვრული რეკვიზიტების გათვალისწინებით.

- ▶ საარჩევნო ყუთის გახსნიდან კენჭისყრის შედეგების შემაჯამებელი ოქმის შედგენამდე (გარდა კენჭისყრის შედეგების შემაჯამებელი ოქმის შედგენისა), გაასაჩივრონ ხმის დათვლისა და კენჭისყრის შედეგების შეჯამების პროცედურების დროს ჩადენილი დარღვევები და მოითხოვონ **კენჭისყრის შედეგების გადასინჯვა ან ბათილად ცნობა.**

ყურადღება!

განცხადება/საჩივარი საარჩევნო ყუთის გახსნიდან კენჭისყრის შედეგების შემაჯამებელი ოქმის შედგენამდე (გარდა კენჭისყრის შედეგების შემაჯამებელი ოქმის შედგენისა) ჩადენილ დარღვევებზე საუბნო საარჩევნო კომისიის მიერ ზემდგომ საოლქო საარჩევნო კომისიას გადაეცემა კენჭისყრის დღიდან 3 კალენდარული დღის განმავლობაში. განმცხადებელს/მომჩივანს უფლება აქვს იმავე დარღვევაზე განცხადება/საჩივარი იმავე ვადაში უშუალოდ გადასცეს საოლქო საარჩევნო კომისიას.

საუბნო საარჩევნო კომისიის კენჭისყრის შედეგების შემაჯამებელი ოქმი შედგენიდან 3 კალენდარული დღის ვადაში საჩივრდება ზემდგომ საოლქო საარჩევნო კომისიაში, თუ საუბნო საარჩევნო კომისიის კენჭისყრის შედეგების შემაჯამებელი ოქმი შედგენილია აღნიშნული საარჩევნო კანონმდებლობის მოთხოვნათა დარღვევით.

საოლქო საარჩევნო კომისიაში განცხადება/საჩივრის რეგისტრაცია

საოლქო საარჩევნო კომისიაში შეტანილ განცხადება/საჩივარს რეგისტრაციაში ატარებს კომისიის მდივანი, შემდეგი წესის მიხედვით:

- ▶ კომისიის მდივანი სარეგისტრაციო ჟურნალში მიუთითებს განმცხადებლის ვინაობას;
- ▶ განცხადება/საჩივრის წარმდგენი და მიმღები პირები ხელს აწერენ ჩანაწერის გასწვრივ;
- ▶ კომისიის მდივანი, განცხადება/საჩივრის მიღების დადასტურების მიზნით, განმცხადებელს გადასცემს წერილობით ცნობას საკუთარი ხელმოწერით და ბეჭდით;
- ▶ კომისიის მდივანი ვალდებულია დარწმუნდეს, რომ განცხადება/საჩივარი შეიცავს საქართველოს ორგანული კანონის „საქართველოს საარჩევნო კოდექსი“ დადგენილი ყველა საჭირო რეკვიზიტს (იხ. დანართი №2).

თუ საოლქო საარჩევნო კომისიი მდივანი არ იბარებს განცხადება/საჩივარს განმცხადებელს უფლება აქვს დაუკავშირდეს ცხელ ხაზს ნომერზე: 032-251 00 51.

განცხადება/საჩივრებზე ხარვეზის დადგენა

საოლქო საარჩევნო კომისიის მდივანი ვალდებულია, განცხადების/საჩივრის წარმდგენს დაუდგინოს ხარვეზი და განუსაზღვროს გონივრული ვადა მის გამოსასწორებლად, თუ განცხადება/საჩივარი არ შეიცავს:

- ▶ განცხადების/საჩივრის შედგენის თარიღსა და დროს;
- ▶ განმცხადებლის/მომჩივნის სახელს, გვარს და რეგისტრაციის ადგილს;
- ▶ საარჩევნო უბნის ნომერს;
- ▶ მოწმის არსებობის შემთხვევაში – მის სახელს, გვარს და რეგისტრაციის ადგილს.

ხარვეზის გამოსასწორებლად მიცემული ვადა უნდა იყოს გონივრული, რომ შემდგომ მითითებული ხარვეზის გამოსწორება.

შენიშვნა: ხარვეზის შევსების გონივრული ვადა დგინდება საოლქო საარჩევნო კომისიის მდივნისა და განცხადება/საჩივრის წარმდგენი პირის შეთანხმების საფუძველზე. ხარვეზის შევსების ვადის თაობაზე მხარეთა შეუთანხმებლობის შემთხვევაში, ვადას ერთპიროვნულად ადგენს საარჩევნო კომისიის მდივანი.

სარეგისტრაციო ჟურნალში ხარვეზის ჩანაწერის გასწვრივ ხელს აწერენ განცხადების/საჩივრის წარმდგენი და მიმღები პირები.

ხარვეზის შევსების პროცედურები

განცხადება/საჩივრის წარმდგენს დადგენილ ვადაში უფლება აქვს გამოასწოროს ხარვეზი ანალოგიური განცხადება/საჩივრის წარმდგენის გზით, რომელშიც აღმოფხვრილი იქნება ხარვეზის დადგენის საფუძვლები ან/და წარადგინოს განცხადება, სადაც მიეთითება ის მონაცემები, რომელთა გამოც დაუდგინდა ხარვეზი.

ხარვეზის შევსების შემთხვევაში განცხადება/საჩივრის მიმღები პირი სარეგისტრაციო ჟურნალში რეგისტრირებული განცხადების/საჩივრის გასწვრივ აკეთებს ჩანაწერს **”შევსებულია”**, ხარვეზის შევსების ზუსტი დროისა და თარიღის მითითებით. ჩანაწერის გასწვრივ ხელს აწერს განცხადება/საჩივრის წარმდგენი და საოლქო საარჩევნო კომიის მდივანი.

შენიშვნა: დადგენილ ვადაში ხარვეზის გამოსწორებლობის შემთხვევაში განცხადება/საჩივარი არ განიხილება, რის თაობაზედაც საუბრო საარჩევნო კომისია გამოსცემს განკარგულებას (განკარგულების სათაურში უნდა მიეთითოს განუხილველად დატოვების კონკრეტული მიზეზი).

რეაგირება განცხადება/საჩივარზე

წარმდგენილი განცხადება/საჩივარი **არ განიხილება** და საოლქო საარჩევნო კომისია გამოსცემს განკარგულებას განცხადება/საჩივრის განუხილველად დატოვების შესახებ, თუ:

- ▶ განცხადება/საჩივარი შედგენილია არაუფლებამოსილი პირის მიერ;
- ▶ განცხადება/საჩივარში არ არის აღნიშნული დარღვევის არსი და მისი ჩადენის დრო;
- ▶ განცხადება/საჩივარი საარჩევნო კომისიას გადაეცა კანონით მოთხოვნილი ვადების დარღვევით.

განკარგულების სათაურში უნდა მიეთითოს განცხადება/საჩივრის განუხილველად დატოვების კონკრეტული მიზეზი.

მხარეების დაბარება განცხადება/საჩივრის განხილვაზე

საოლქო საარჩევნო კომისია ვალდებულია მხარეს საქმის განხილვის დრო და ადგილი შეატყობინოს საქმის განხილვის დაწყებამდე **არა უგვიანეს 3 საათისა. თუ საჩივრის ავტორია:**

- ▶ საარჩევნო კომისიაში რეგისტრირებული დამკვირვებელი ორგანიზაცია ან მისი წარმომადგენელი, საჩივრის განხილვის დროისა და ადგილის შესახებ ეცნობება ამ ორგანიზაციის საარჩევნო კომისიაში რეგისტრირებულ შესაბამის დამკვირვებელს ან ამ ორგანიზაციას;
- ▶ საარჩევნო სუბიექტი ან მისი დანიშნული წარმომადგენელი, საჩივრის განხილვის დროისა და ადგილის შესახებ ეცნობება ამ სუბიექტის მიერ დანიშნულ წარმომადგენელს;
- ▶ საარჩევნო კომისიის წევრი, საჩივრის განხილვის შესახებ პირადად მას უნდა ეცნობოს.

საჩივრის განხილვისათვის მხარეები შეიძლება დაბარებულ იქნენ როგორც წერილობით, ისე ტელეფონით (მათ შორის, მობილური ტელეფონით; მოკლე ტექსტური შეტყობინებით), ელექტრონული ფოსტით, ფაქსით ან სხვა ტექნიკური საშუალებებით.

ტექნიკური საშუალებებით მხარის დაბარება დასტურდება:

- ▶ მის მიერ მითითებულ საკონტაქტო ტელეფონის ნომერზე დაკავშირებით;
- ▶ ელექტრონული ფოსტის, ფაქსის ან მოკლე ტექსტური შეტყობინების შემთხვევაში – შესაბამისი ტექნიკური საშუალებით მოწოდებული დადასტურებით.

შენიშვნა: მხარე დაბარებულად ჩაითვლება, თუ შეუძლებელია მასთან საჩივარში მითითებული ტექნიკური საშუალებებით დაკავშირება (მობილური ტელეფონის, ფაქსის, კომპიუტერის გამორთულ მდგომარეობაში ყოფნის გამო და სხვ.).

ტექნიკური საშუალებებით მხარის დაბარებისას დგება აქტი, რომელიც უნდა დაერთოს კომისიის სხდომაზე წარმოდგენილ საჩივარს. აქტს, კომისიის თავმჯდომარის დავალებით, ადგენს კომისიის ერთ-ერთი წევრი და მას ხელს აწერენ აქტის შემდგენი და საოლქო საარჩევნო კომისიის თავმჯდომარე.

მხარის გამოუცხადებლობა არ ქმნის საჩივრის განხილვის გადადების საფუძველს.

განცხადება/საჩივრის განხილვა საოლქო საარჩევნო კომისიაში

საჩივრის განხილვის შესახებ გადაწყვეტილება მიიღება მხარეთა მიერ წარმოდგენილი მტკიცებულებებისა და საკუთარი ინიციატივით საქართველოს საარჩევნო ადმინისტრაციის მიერ მოპოვებული მასალების სათანადო გამოკვლევისა და შესწავლის შემდეგ.

მხარეს უფლება აქვს, საქართველოს საარჩევნო კანონმდებლობით დადგენილი წესით მიიღოს მონაწილეობა საჩივრის განხილვაში.

მხარეს **უფლება აქვს** საარჩევნო კომისიასთან აწარმოოს ურთიერთობა:

- ▶ წარმომადგენლის მეშვეობით;
- ▶ ისარგებლოს ადვოკატის დახმარებით.

წარმომადგენელი ვალდებულია საარჩევნო კომისიაში წარადგინოს კანონით დადგენილი წესით დამოწმებული **წარმომადგენლობის დამადასტურებელი საბუთი**:

- ▶ ამომრჩეველთა საინიციატივო ჯგუფის წარმომადგენლობა დასტურდება მათ მიერ გაცემული და სანოტარო წესით დამოწმებული მინდობილობით;
- ▶ ორგანიზაციების (პარტია, საარჩევნო ბლოკი, დამკვირვებელი ორგანიზაცია) წარმომადგენლობა დასტურდება მათი ხელმძღვანელი პირის მიერ გაცემული მინდობილობით;
- ▶ ადვოკატის წარმომადგენლობა დასტურდება მარწმუნებლის მიერ დადგენილი წესით მასზე გაცემული დოკუმენტით (მინდობილობა/ორდერი).

ყურადღება!

თუ წარმომადგენელი არ წარადგენს შესაბამისი წესით დამოწმებულ წარმომადგენლობის დამადასტურებელ საბუთს, მას არ მიეცემა განცხადება/საჩივრის განხილვაში მონაწილეობის უფლება და გადაწყვეტილება მიიღება მისი პოზიციის გაუთვალისწინებლად.

ხმის დათვლისა და კენჭისყრის შედეგების შეჯამებასთან დაკავშირებულ განცხადება/საჩივარს საოლქო საარჩევნო კომისია განიხილავს და გადაწყვეტილებას იღებს საოლქო საარჩევნო კომისიაში განცხადების/საჩივრის **რეგისტრაციიდან 1 კალენდარული დღის ვადაში**. საოლქო საარჩევნო კომისია გადაწყვეტილებას იღებს განკარგულებით, რომელიც შეიძლება გასაჩივრდეს მხოლოდ სასამართლოში საარჩევნო კოდექსით დადგენილი წესით.

საუბნო საარჩევნო კომისიის/კომისიის ხელმძღვანელი პირების გადაწყვეტილებები მათი მიღებიდან **3 კალენდარული დღის** ვადაში შეიძლება გასაჩივრდეს შესაბამის საოლქო საარჩევნო კომისიაში.

საოლქო საარჩევნო კომისია საუბნო საარჩევნო კომისიის/კომისიის ხელმძღვანელი პირების გადაწყვეტილებების გამო შეტანილ საჩივარს **იხილავს 1 კალენდარული დღის ვადაში**.

საოლქო საარჩევნო კომისიაში განცხადება/საჩივრის რეგისტრაცია

საოლქო საარჩევნო კომისიაში შეტანილ განცხადება/საჩივარს რეგისტრაციაში ატარებს კომისიის მდივანი, შემდეგი წესის მიხედვით:

- ▶ კომისიის მდივანი სარეგისტრაციო ჟურნალში მიუთითებს განმცხადებლის ვინაობას;
- ▶ განცხადება/საჩივრის წარმდგენი და მიმღები პირები ხელს აწერენ ჩანაწერის გასწვრივ;
- ▶ კომისიის მდივანი, განცხადება/საჩივრის მიღების დადასტურების მიზნით, განმცხადებელს გადასცემს წერილობით ცნობას საკუთარი ხელმოწერით და ბეჭდით.

ყურადღება!

მხარეები ვალდებული არიან განცხადება/საჩივარში, გარდა კანონმდებლობით დადგენილი მოთხოვნებისა, გარკვევით მიუთითონ განცხადება/საჩივრის ავტორის საკონტაქტო (საცხ. ადგილისა და მობილურის) ტელეფონის ნომრები, ასევე დამატებით მითითებული უნდა იქნეს განცხადება/საჩივრის ავტორის ფაქსისა და ელექტრონული ფოსტის მისამართი (ასეთის არსებობის შემთხვევაში).

რეაგირება განცხადება/საჩივარზე

წარდგენილი განცხადება/საჩივარი არ განიხილება და საოლქო საარჩევნო კომისია გამოსცემს განკარგულებას განცხადება/საჩივრის განუხილველად დატოვების შესახებ, თუ:

- ▶ განცხადება/საჩივარი შედგენილია არაუფლებამოსილი პირის მიერ;
- ▶ განცხადება/საჩივარი საარჩევნო კომისიას გადაეცა კანონით მოთხოვნილი ვადებისა და წესის დარღვევით.

ყურადღება!

საოლქო საარჩევნო კომისიაში არ ხდება საარჩევნო კანონმდებლობის დარღვევების გამო (გარდა კენჭისყრის დღისა) წარდგენილი განცხადება/საჩივრის ხარვეზის დადგენა. შესაბამისი საფუძვლების არსებობისას განცხადება/საჩივარი ხარვეზის დაუდგენლად რჩება განუხილველი.

საოლქო საარჩევნო კომისიაში მხარეების დაბარება განცხადება/საჩივრის განხილვაზე და განცხადება/საჩივრის განხილვა მიმდინარეობს ერთიანი წესით, რაც განხილულ იქნა კენჭისყრისა და ხმის დათვლის პროცედურების დარღვევებზე წარდგენილ განცხადება/საჩივრებთან მიმართებაში.

საოლქო საარჩევნო კომისიის/კომისიის ხელმძღვანელი პირების გადაწყვეტილებები საუბნო საარჩევნო კომისიის/კომისიის ხელმძღვანელი პირების გადაწყვეტილებების გამო (მათ შორის შემაჯამებელი ოქმის შედგენის გამო) **2 კალენდარული დღის ვადაში** შეიძლება გასაჩივრდეს შესაბამის რაიონულ/საქალაქო სასამართლოში.

საოლქო საარჩევნო კომისიის/კომისიის ხელმძღვანელ პირთა გადაწყვეტილებები, გარდა ზემოთ აღნიშნული გადაწყვეტილებებისა, მისი მიღებიდან **1 კალენდარული დღის ვადაში** შეიძლება გასაჩივრდეს ცესკოში.

ყურადღება!

საოლქო საარჩევნო კომისიის გადაწყვეტილება **2 კალენდარული დღის ვადაში** საჩივრდება შესაბამის რაიონულ/საქალაქო სასამართლოში შემდეგ გამოჩვენების შემთხვევებში:

- ▶ საოლქო საარჩევნო კომისიის განკარგულება ამომრჩეველთა მონაცემებში/სიებში ცვლილების შეტანაზე უარის თქმის შესახებ;
- ▶ საარჩევნო კომისიის განკარგულება დამკვირვებელი ორგანიზაციის რეგისტრაციაზე უარის თქმის შესახებ.

5.3. ცესკოში განცხადება/საჩივრის შეტანისა და განხილვის წესი

ცესკოში განცხადება/საჩივრის შეტანა

საარჩევნო კოდექსით განსაზღვრულ სუბიექტებს უფლება აქვთ განცხადება/საჩივრით მიმართონ ცესკოს:

- ▶ საქართველოს საარჩევნო კანონმდებლობის დარღვევებზე;
- ▶ საოლქო საარჩევნო კომისიის/კომისიის ხელმძღვანელი პირების მიერ მიღებული გადაწყვეტილებების თაობაზე.

საოლქო საარჩევნო კომისიის/კომისიის ხელმძღვანელი პირების გადაწყვეტილებები (მათ შორის საოლქო საარჩევნო კომისიის კენჭისყრის/არჩევნების შედეგების შემაჯამებელი ოქმის შედგენა) მათი მიღებიდან **1 კალენდარული დღის** ვადაში შეიძლება გასაჩივრდეს ცესკოში.

ცესკოში განცხადება/საჩივრის რეგისტრაცია

ცესკოში შეტანილ განცხადება/საჩივარს რეგისტრაციაში ატარებს ცესკოს ადმინისტრაციული დეპარტამენტი.

განცხადება/საჩივარი ცესკოში მიღებისას დაუყოვნებლივ ტარდება სარეგისტრაციო ჟურნალში, სადაც უწყვეტი თანმიმდევრობით აღირიცხება მათი შემოსვლის რიგის მიხედვით. თითოეულ დოკუმენტს მიენიჭება შესაბამისი ნომერი, ჟურნალში შეიტანება მისი შემოსვლის თარიღი, დრო და ფურცლების რაოდენობა. სარეგისტრაციო ჟურნალში აღინიშნება განმცხადებლის/მომჩივანის

ვინაობა და საკონტაქტო ტელეფონი. ჟურნალში სათანადოდ რეგისტრაციის შემდეგ განმცხადებელს/მომჩივანს გადაეცემა წერილობითი ცნობა, რომელშიც მიეთითება:

- ▶ განცხადების/საჩივრის მიღების თარიღი და ზუსტი დრო;
- ▶ სარეგისტრაციო ჟურნალში მისთვის მინიჭებული ნომერი .

აღნიშნულ ცნობას განცხადების/საჩივრის მიმღები ცესკოს თანამშრომელი ადასტურებს ხელმოწერითა და ბეჭდით.

ყურადღება!

- ▶ მხარეები ვალდებული არიან განცხადება/საჩივარში, გარდა კანონმდებლობით დადგენილი მოთხოვნებისა, გარკვევით მიუთითონ განცხადება/საჩივრის ავტორის საკონტაქტო (საცხ. ადგილისა და მობილურის) ტელეფონის ნომრები, ასევე დამატებით მითითებული უნდა იქნეს განცხადება/საჩივრის ავტორის ფაქსისა და ელექტრონული ფოსტის მისამართი (ასეთის არსებობის შემთხვევაში).
- ▶ თუ ცესკოს შესაბამისი სამსახურის თანამშრომელი არ იზარებს განცხადება/საჩივარს დაუკავშირდით ცესკოს ცხელ ხაზს ნომერზე: 032-251 00 51.

რეაგირება განცხადება/საჩივარზე

წარდგენილი განცხადება/საჩივარი არ განიხილება და ცესკო გამოსცემს განკარგულებას განცხადება/საჩივრის განუხილველად დატოვების შესახებ, თუ:

- ▶ განცხადება/საჩივარი შედგენილია არაუფლებამოსილი პირის მიერ;
- ▶ განცხადება/საჩივარი ეხება საუბნო საარჩევნო კომისიის გადაწყვეტილების გასაჩივრების გამო საოლქო საარჩევნო კომისიის მიერ მიღებულ გადაწყვეტილებას;
- ▶ განცხადება/საჩივარი საარჩევნო კომისიას გადაეცა კანონით მოთხოვნილი ვადებისა და წესის დარღვევით.

ყურადღება!

ცესკოში არ ხდება საარჩევნო კანონმდებლობის დარღვევების გამო წარდგენილი განცხადება/საჩივრის ხარვეზის დადგენა. შესაბამისი საფუძვლების არსებობისას განცხადება/საჩივარი ხარვეზის დაუდგენლად რჩება განუხილველი.

მხარეების დაბარება განცხადება/საჩივრის განხილვაზე

ცესკო ვალდებულია მხარეს საქმის განხილვის დრო და ადგილი შეატყობინოს საქმის განხილვის დაწყებამდე არა უგვიანეს 3 საათისა.

თუ საჩივრის ავტორია:

- ▶ საარჩევნო კომისიაში რეგისტრირებული დამკვირვებელი ორგანიზაცია ან მისი წარმომადგენელი, საჩივრის განხილვის დროისა და ადგილის შესახებ ეცნობება ამ ორგანიზაციის საარჩევნო კომისიაში რეგისტრირებულ შესაბამის დამკვირვებელს ან ამ ორგანიზაციას;
- ▶ საარჩევნო სუბიექტი ან მისი დანიშნული წარმომადგენელი, საჩივრის განხილვის დროისა და ადგილის შესახებ ეცნობება ამ სუბიექტის მიერ დანიშნულ წარმომადგენელს;
- ▶ საარჩევნო კომისიის წევრი, საჩივრის განხილვის შესახებ პირადად მას უნდა ეცნობოს.

საჩივრის განხილვისათვის მხარეები შეიძლება დაბარებულ იქნენ როგორც წერილობით, ისე ტელეფონით (მათ შორის, მობილური ტელეფონით; მოკლე ტექსტური შეტყობინებით), ელექტრონული ფოსტით, ფაქსით ან სხვა ტექნიკური საშუალებებით.

ტექნიკური საშუალებებით მხარის დაბარება დასტურდება:

- ▶ მის მიერ მითითებულ საკონტაქტო ტელეფონის ნომერზე დაკავშირებით;
- ▶ ელექტრონული ფოსტის, ფაქსის ან მოკლე ტექსტური შეტყობინების შემთხვევაში – შესაბამისი ტექნიკური საშუალებით მოწოდებული დადასტურებით.

შენიშვნა: მხარე დაბარებულად ჩაითვლება, თუ შეუძლებელია მასთან საჩივარში მითითებული ტექნიკური საშუალებებით დაკავშირება (მობილური ტელეფონის, ფაქსის, კომპიუტერის გამორთულ მდგომარეობაში ყოფნის გამო და სხვ.).

ტექნიკური საშუალებებით მხარის დაბარებისას დგება აქტი, რომელიც უნდა დაერთოს კომისიის სხდომაზე წარმოდგენილ საჩივარს. ცესკოში აქტს ადგენს ცესკოს იურიდიული დეპარტამენტის თანამშრომელი და მას ხელს აწერენ აქტის შემდგენი პირი და სამსახურის უფროსი. მხარის გამოუცხადებლობა არ ქმნის საჩივრის განხილვის გადადების საფუძველს.

ცესკოში განცხადება/საჩივრის განხილვა

საჩივრის განხილვის შესახებ გადაწყვეტილება მიიღება მხარეთა მიერ წარმოდგენილი მტკიცებულებებისა და საკუთარი ინიციატივით საქართველოს საარჩევნო ადმინისტრაციის მიერ მოპოვებული მასალების სათანადო გამოკვლევისა და შესწავლის შემდეგ.

მხარეს უფლება აქვს, საქართველოს საარჩევნო კანონმდებლობით დადგენილი წესით მიიღოს მონაწილეობა საჩივრის განხილვაში.

მხარეს **უფლება აქვს** საარჩევნო კომისიასთან აწარმოოს ურთიერთობა:

- ▶ წარმომადგენლის მეშვეობით;
- ▶ ისარგებლოს ადვოკატის დახმარებით.

წარმომადგენელი ვალდებულია საარჩევნო კომისიაში წარადგინოს კანონით დადგენილი წესით დამოწმებული **წარმომადგენლობის დამადასტურებელი საბუთი**:

- ▶ ამომრჩეველთა საინიციატივო ჯგუფის წარმომადგენლობა დასტურდება მათ მიერ გაცემული და სანოტარო წესით დამოწმებული მინდობილობით;
- ▶ ორგანიზაციების (პარტია, საარჩევნო ბლოკი, დამკვირვებელი ორგანიზაცია) წარმომადგენლობა დასტურდება მათი ხელმძღვანელი პირის მიერ გაცემული მინდობილობით;
- ▶ ადვოკატის წარმომადგენლობა დასტურდება მარწმუნებლის მიერ დადგენილი წესით მასზე გაცემული დოკუმენტით (მინდობილობა/ორდერით).

ყურადღება!

თუ წარმომადგენელი არ წარადგენს შესაბამისი წესით დამოწმებულ წარმომადგენლობის დამადასტურებელ საბუთს, მას არ მიეცემა განცხადება/საჩივრის განხილვაში მონაწილეობის უფლება და გადაწყვეტილება მიიღება მისი პოზიციის გაუთვალისწინებლად.

ცესკო საოლქო საარჩევნო კომისიის/კომისიის ხელმძღვანელი პირების გადაწყვეტილებების გამო შეტანილ საჩივარს იხილავს **1 კალენდარული დღის ვადაში**.

გასაჩივრების ვადა და
წესი

ცესკოს/ცესკოს ხელმძღვანელი პირების გადაწყვეტილებები

ცესკოს/ცესკოს ხელმძღვანელი პირების გადაწყვეტილება (მათ შორის არჩევნების შედეგების შემაჯამებელი ოქმის შედგენა), საარჩევნო კოდექსის 78-ე მუხლით განსაზღვრული პირების მიერ,

შეიძლება გასაჩივრდეს თბილისის საქალაქო სასამართლოში კომისიის მიერ მისი მიღებიდან **2 კალენდარული დღის ვადაში**.

5.4. ადმინისტრაციულ სამართალდარღვევათა ოქმის შედგენა

საარჩევნო კოდექსით განსაზღვრულ სუბიექტებს უფლება აქვთ მიმართონ ცესკოს ან საოლქო საარჩევნო კომისიას განცხადება/საჩივრით საქართველოს ორგანული კანონის „საქართველოს საარჩევნო კოდექსი“ **79-ე, 81-ე და 86-ე-92-ე მუხლებით** და „საქართველოს ადმინისტრაციულ სამართალდარღვევათა კოდექსის“ **174² მუხლით** გათვალისწინებულ ადმინისტრაციულ სამართალდარღვევათა შესახებ.

ცესკოში ადმინისტრაციულ სამართალდარღვევათა ოქმს ადგენს ცესკოს თავმჯდომარე, ხოლო შესაბამისი საოლქო საარჩევნო კომისიაში - კომისიის მიერ განსაზღვრული უფლებამოსილი პირი (საოლქო საარჩევნო კომისიის თავმჯდომარე/თავმჯდომარის მოადგილე).

ადმინისტრაციულ სამართალდარღვევათა ოქმის შედგენის თაობაზე წარდგენილ განცხადება/საჩივარს ზეპირი მოსმენით ერთპიროვნულად იხილავს ოქმის შედგენაზე უფლებამოსილი პირი, დაინტერესებული მხარეების მონაწილეობით, რის თაობაზეც დგება ზეპირი მოსმენის ოქმი. მოსმენის შედეგად ოქმის შედგენაზე უფლებამოსილი პირი **იღებს გადაწყვეტილებას**:

- ▶ განცხადება/საჩივრის დაკმაყოფილებისა და ადმინისტრაციულ სამართალდარღვევათა ოქმის შედგენის თაობაზე;
- ▶ განცხადება/საჩივრის დაკმაყოფილებაზე უარის თქმის თაობაზე.

ყურადღება!

ადმინისტრაციულ სამართალდარღვევათა საქმის განხილვისას ადმინისტრაციულ პასუხისგებაში მიცემული პირის დასწრება სავალდებულოა. თუ ეს პირი თავს არიდებს გამოცხადებას, იგი შეიძლება იძულებით იქნეს მოყვანილი შინაგან საქმეთა ორგანოს მიერ.

ადმინისტრაციულ სამართალდარღვევათა ოქმი ივსება ორ ეგზემპლარად, რომელთაგან პირველი ეგზემპლარი რჩება ადმინისტრაციულ სამართალდარღვევათა ოქმის შედგენაზე უფლებამოსილი პირს, ხოლო მეორე გადაეცემა სამართალდამრღვევს.

ყურადღება!

ადმინისტრაციულ სამართალდარღვევათა ოქმი და მასზე თანდართული მასალები, ოქმის შედგენისთანავე დაუყოვნებლივ განსახილველად იგზავნება შესაბამის რაიონულ/საქალაქო სასამართლოში.

ცესკოს თავმჯდომარის გადაწყვეტილება (განკარგულება) ადმინისტრაციულ სამართალდარღვევათა ოქმის შედგენის შესახებ განცხადება/საჩივრის დაკმაყოფილებაზე **უარის** თქმის თაობაზე, საჩივრდება **თბილისის საქალაქო სასამართლოში** გადაწყვეტილების მიღებიდან **2 კალენდარული დღის ვადაში**.

ოქმის შედგენაზე საოლქო საარჩევნო კომისიის უფლებამოსილი პირის გადაწყვეტილება (განკარგულება) ადმინისტრაციულ სამართალდარღვევათა ოქმის შედგენის შესახებ განცხადება/საჩივრის დაკმაყოფილებაზე **უარის** თქმის თაობაზე, **საჩივრდება ცესკოში** გადაწყვეტილების მიღებიდან **1 კალენდარული დღის ვადაში**.

5.5. საჩივრების რეესტრი

საქართველოს ცენტრალური საარჩევნო კომისიის ვებ-გვერდზე არსებულ საჩივრების რეესტრში (<http://sachivrebi.cec.gov.ge/>) ამომრჩევლებისთვის და ყველა დაინტერესებული პირისა თუ ორგანიზაციისთვის საჩივრებისა და მასთან დაკავშირებული ინფორმაციის დროულად მიწოდების მიზნით, საარჩევნო პერიოდში თავსდება:

- ▶ ცესკოში შემოსული საჩივრები და მასთან დაკავშირებული ინფორმაცია;
- ▶ ინფორმაცია საარჩევნო პერიოდში, საარჩევნო საკითხებთან დაკავშირებულ, ცესკოს მონაწილეობით გამართული, სასამართლო პროცესების შესახებ;

ყურადღება!

ინფორმაციას რეესტრში განთავსებს ცესკოს იურიდიული დეპარტამენტის სასამართლოებთან ურთიერთობისა და საარჩევნო დავების განყოფილება, შესაბამისი ინფორმაციის მიღებიდან არა უგვიანეს ერთი დღისა.

- ▶ საოლქო საარჩევნო კომისიებში შესული საჩივრები და მასთან დაკავშირებული ინფორმაცია; კერძოდ: რეგისტრაციის ნომერი, შემოტანის თარიღი, შემომტანი, განცხადება/საჩივარი, განხილვის ადგილი და თარიღი, გადაწყვეტილება, განცხადების/საჩივრის და გადაწყვეტილების დასკანირებული ვერსია;
- ▶ საუბნო საარჩევნო კომისიებში შესული საჩივრები და მასთან დაკავშირებული ინფორმაცია. კერძოდ: რეგისტრაციის ნომერი, შემოტანის თარიღი, შემომტანი, განცხადება/საჩივარი, განხილვის ადგილი და თარიღი, გადაწყვეტილება, განცხადების/საჩივრის და გადაწყვეტილების დასკანირებული ვერსია.

ყურადღება!

საოლქო საარჩევნო კომისია აღნიშნულ ინფორმაციას რეესტრში განთავსების მიზნით, საოლქო საარჩევნო კომისიის მიერ გადაწყვეტილების მიღებიდან 1 დღის ვადაში, აწვდის ცესკოს საორგანიზაციო დეპარტამენტის საარჩევნო ინფორმაციის მართვის განყოფილებას, რომელიც უზრუნველყოფს მის განთავსებას რეესტრში შესაბამისი ინფორმაციის მიღებიდან არა უგვიანეს ერთი დღისა.

რეესტრში განთავსებული ინფორმაციის სისრულესა და სიზუსტეზე პასუხისმგებელია შესაბამისი სტრუქტურული ერთეულის თანამშრომელი, რომელიც განთავსებს ინფორმაციას.

ვებ-გვერდზე განთავსებული საჩივრების რეესტრის ადმინისტრირებას ახორციელებს იურიდიული დეპარტამენტის სასამართლოებთან ურთიერთობისა და საარჩევნო დავების განყოფილება, საორგანიზაციო დეპარტამენტის საარჩევნო ინფორმაციის მართვის განყოფილებასთან ერთად.

რეესტრში განთავსებული ინფორმაცია საჯარო და უსასყიდლოა.

რეესტრში განთავსებული ინფორმაციის გამოყენება თავისუფალია. დაინტერესებულ პირებს უფლება აქვთ გამოიყენონ რეესტრში განთავსებული ინფორმაცია ვებ-მისამართის სავალდებულო მითითებით.

- ა) განცხადება/საჩივრის საარჩევნო უბანში წარდგენის შემთხვევაში მიეთითება საარჩევნო უბნისა და ოლქის დასახელება და ნომერი
ბ) განცხადება/საჩივრის საარჩევნო ოლქში წარდგენის შემთხვევაში მიეთითება საარჩევნო ოლქის დასახელება და ნომერი

გ ა ნ ც ხ ა დ ე ბ ა / ს ა ჩ ი ვ ა რ ი
(საჭირო გახაზეთ)

განმცხადებელი/მომჩივანი -----
სახელი, გვარი, მისამართი რეგისტრაციის ადგილის მიხედვით და საკონტაქტო ტელეფონის ნომერი

ფაქსი, ელ.ფოსტის მისამართი (ასეთის არსებობის შემთხვევაში)

დარღვევა: კენჭისყრის პროცედურა ☐ **დარღვევის ჩადენის დრო** -----
საათი, წუთი

ხმის დათვლა/კენჭისყრის შედეგების

შეჯამების პროცედურა ☐ **№** "___" "_____" **საარჩევნო უბანი**

დარღვევის არსი : -----

მოწმე (არსებობის შემთხვევაში) -----
სახელი, გვარი, მისამართი რეგისტრაციის ადგილის მიხედვით

დამრღვევის დადგენის შემთხვევაში - მისი ის მონაცემები, რომელთა დადგენაც შესაძლებელი გახდა -----

დამრღვევის ახსნა-განმარტება (ასეთის არსებობის შემთხვევაში) -----

(სხვა დამატებითი ინფორმაცია) -----

ყოველივე ზემოაღნიშნულიდან გამომდინარე, გთხოვთ, განიხილოთ ჩემი განცხადება/საჩივარი და მოახდინოთ შესაბამისი რეაგირება (ბათილობის ან სხვა მოთხოვნის შემთხვევაში მიუთითეთ შესაბამისი მოთხოვნა) -----

”___“ “_____“ 20---- წელი

განმცხადებელი/მომჩივანი:

განცხადების/საჩივრის -----

(შედგენის დრო (საათი, წუთი))

ხელმოწერა

საარჩევნო კომისიაში წარდგენილი განცხადება/საჩივრის რეკვიზიტები

- ✓ განცხადებაში/საჩივარში აღინიშნება:
- ✓ განცხადების/საჩივრის შედგენის თარიღი და დრო*;
- ✓ განმცხადებლის/მომჩივნის სახელი, გვარი და რეგისტრაციის ადგილი*;
- ✓ საარჩევნო უბნის ნომერი*;
- ✓ მოწმის არსებობის შემთხვევაში – მისი სახელი, გვარი და რეგისტრაციის ადგილი*;
- ✓ დარღვევის არსი და მისი ჩადენის დრო**;
- ✓ დამრღვევის დადგენის შემთხვევაში – მისი ის მონაცემები, რომელთა დადგენაც შესაძლებელი გახდა**;
- ✓ დამრღვევის ახსნა-განმარტება (ასეთის არსებობის შემთხვევაში)**;
- ✓ განმცხადებლის/მომჩივნის საკონტაქტო ტელეფონის (საცხოვრებელი ადგილის ან/და მობილურის) ნომერი***;
- ✓ ასევე განმცხადებლის/მომჩივნის ფაქსი და ელექტრონული ფოსტის მისამართი (მათი არსებობის შემთხვევაში)***;
- ✓ სხვა დამატებითი ინფორმაცია.

* აღნიშნული რეკვიზიტების მიუთითებლობა არაზუსტად ან არასრულყოფილად წარმოადგენს განცხადება/საჩივარზე ხარვეზის დადგენის საფუძველს, ხოლო ხარვეზის გამოუსწორებლობის შემთხვევაში, მისი განუხილველად დატოვების საფუძველს

** აღნიშნული რეკვიზიტების მიუთითებლობა წარმოადგენს ხარვეზის დადგენის გარეშე განცხადება/საჩივრის განუხილველად დატოვების საფუძველს

*** აღნიშნული რეკვიზიტების მიუთითებლობა არაზუსტად ან არასრულყოფილად არ შეიძლება გახდეს განცხადება/საჩივრის ხარვეზის დადგენის და განუხილველად დატოვების საფუძველი, მაგრამ შეიძლება გახდეს მხარის საჩივრის განხილვაზე დაბარების შეუძლებლობის საფუძველი

This image shows a full page of blank, lined paper. It features approximately 20 evenly spaced horizontal grey lines across its entire width, providing a guide for handwriting or typing. The background is a solid off-white color.

[illegible]

[illegible]

შენიშვნებისთვის

[illegible]



გამოცემა დაფინანსებულია ევროკავშირისა (EU) და გაეროს განვითარების პროგრამის (UNDP) მიერ. გამოცემის შინაარსი წარმოადგენს საარქივო სისტემების განვითარების, რეფორმებისა და სწავლების ცენტრის პასუხისმგებლობას და არ გამოხატავს ევროკავშირისა თუ გაეროს განვითარების პროგრამის შეხედულებებს.

This publication has been produced with the assistance of the European Union (EU) and United Nations Development Programme (UNDP). The contents of this publication are the sole responsibility of the Centre of Electoral System Development, Reforms and Trainings and can in no way be taken to reflect the views of the EU or UNDP.



*Empowered lives.
Resilient nations.*